

鐘祥縣志

熊道琛署


鍾祥縣志



熊道琛署



中華民國二十六年
二月刊於首都



鍾祥縣志卷之二十六

列女傳三

張氏蕭學望妻諸生瑞雲之母也學望歿泣血三年形如槁木除服益垢敝自晦操
作無寧晷卒撫瑞雲成立守節歷三十七年

張氏蕭次倩妻次倩歿遺孤一矢志守節不以激烈見異貞靜恬淡一如其夫存日
舅姑亦遂減其思子之哀居無何舅姑相繼卒先是夫亡時婦惟飲泣吞聲操作
靡間及執舅姑之喪乃晝夜哀號無已時聞者莫不悲之守節歷三十七年

楊氏蕭天麟妻天麟歿踰四月遺腹生子承瑞舅諸生韶成姑鄧皆享年九十有奇
侍奉扶持終身如一日舅姑歿率承瑞哀禮備至鄉里以孝稱苦節四十八年卒
承瑞婦劉亦以節著

劉氏歸承瑞三載生子繼書甫六月承瑞卒茹苦含辛誓從姑志會遭兵燹屋宇
焚燬家無擔石之儲紡績度日上事孀姑下撫孤子及孫開明入塾讀書督課必



嚴守節五十八年

胡氏國學生蕭光清妻夫亡無子以姪紹東爲嗣教養兼至紹東爲縣學生生子二紹東歿長子亦繼歿復撫次孫成立年八十卒光清從兄弟光烈妻陳氏光謙妻周氏均守節數十年事實已不可概見其可考者則有紹東兄弟行紹清妻饒氏紹藩妻李氏紹彬妻王氏

饒氏紹清繼室紹清前妻謝遺女二饒撫如己出生子曰昌而紹清歿遺腹生次子曰愷矢志無他仰事俯畜孝慈兼盡曰昌曰愷次第授室不幸相繼歿折率二寡媳撫三稚孫歷盡艱辛苦節歷四十四年

李氏歸紹藩數年而寡家貧無子以姪爲嗣年五十卒

王氏紹彬繼室紹彬亡撫前妻子女教誨肫至過於所生守節歷三十四年

王氏蕭熙進妻夫亡無子守節歷數十年年七十七卒

樊氏蕭尙仁妻夫亡無子家遺薄產族人或利之欲奪其志婦夷然棄之毀容抱節

依弟貢生謙中以居族中爲之立嗣復殤遂不歸卒於母家與夫合瘞焉苦節歷三十七年

李氏蕭大鼎母現年九十五又大政母解氏現年八十六

蕭昌金石牌人世和之女性喜佛立志守貞不肯字人嘗捐貲購房屋一棟作爲節孝堂并捐田二十畝備堂內養膳之資凡貧寒孀婦處女有志修鍊者昌金皆收養之以是保全貞節者不少年六十九卒

吳氏蕭敷五之母現年八十七李氏蕭汝文之母現年九十四皆石牌人

劉氏蕭培莖妻歸培莖伉儷甚篤培莖染病亡無子婦痛欲殉因夫兄遠貿強抑之旬餘夫兄歸急爲卜葬婦薦食痛哭大異往日晚沐浴更衣畢吞金而死次晨議救尸已寒矣

劉氏年十八歸蕭光溥八閱月而光溥卒時因舅姑在堂未敢言死無何舅姑先後逝劉期以身殉妣某力勸之命子承嗣爲禋祀計乃撫嗣支立門戶年近八十康

健如常鄉人爲立節孝碑以旌之其從子婦有明隆妻劉氏明杞妻彭氏皆青年守節蓋漸染於節婦者深矣

樂氏曾異振妻夫歿遺腹生子矢志撫孤綜理家政內外井然兼撫夫弟異撰異抱以嫂任母督誨肫肫異撰食廩餼異抱亦補諸生年九十五而終

龔氏曾鴻妻鴻歿舅姑憐其年少且無出勸令改適龔截髮毀形誓死不從年六十餘卒

龔氏曾揆妻揆歿無子矢志守節姑絕憐之迨姑歿哭至失明依夫兄向穀城學署向夫婦相繼卒與十歲孤姪相依爲命備歷艱苦守節五十餘年而終

石氏曾時會妻夫歿欲以身殉念舅姑垂老孤子在抱勵志完節歷四十餘年鄉里稱之

趙氏曾炷妻年十六歸炷事舅姑稱孝炷有兄遠游而死典厝具資夫迎兄喪夫復於中道溺死聞耗欲以身殉念舅歿姑老且孀寡無依強起治事遺腹生次子乃

以長子後夫兄姑暨姒相繼卒以次營葬均如禮姒遺孤女撫如所生既長擇婿資嫁之自遭數喪後家益落節衣縮食歷十餘年乃稍克自給子姪少長擇師從學義方凜然守節四十八年鄉人稱婦孝友賢淑爲女中丈夫不徒以節著云

耿氏曾元華妻結褵踰歲而寡痛欲殉夫自念身有遺腹或延一脉乃已後果舉男教養以至成立苦節歷五十年

楊氏曾傳國妻夫亡撫嗣子紀清至成立秉性嚴肅家人咸敬憚之年七十四卒又傳鑑妻石氏夫亡撫子彥誠教以儒業彥誠補諸生守節歷三十六年

朱氏曾衍元妻夫亡撫子娶婦生孫子又亡復撫孫成立守節歷五十餘年

鄧氏曾毓成妻夫亡家無期功強近之親一子傳點尙幼乃依母家兄嫂居卒撫孤成立以存曾氏苦節四十餘年卒

汪氏年十八適曾興茂越三歲生女一又六年興茂亡母家以年青無子諷其再嫁汪截髮以誓舅姑憐之命伯氏子毓芳爲嗣初汪來歸興宗兄弟四諸姒因服食

微嫌輒齟齬汪遇事退讓諸姒漸感悟相與和睦及嫠居一以撫嗣為志三黨翕然稱之洪楊之亂附近蹂躪殆遍汪所居獨無恙人以為節孝之報云年七十七而卒

張氏曾連吉妻劉氏邦達妻馬氏傳浩妻守節均歷數十年張氏劉氏並經題請旌表

蔣母鄭氏舉人鳳騫之母鳳騫父其昌年少能文有行誼邑人咸推重之母年十九來歸五載生鳳騫甫八月其昌歿鍵戶紡績歲時伏臘雖族姻在子姪行者未嘗見其面鄰人每聞晝哭聲為之惻然鳳騫稍長就外傅母詔之曰汝父力學有名聲而勇於為人不幸早世予不即從汝父地下者以汝故耳願汝能繼父志汝父為不死矣鳳騫受命維謹用是鄉人稱其昌有子亦推原鳳騫之有母云母年八十三終入祀節孝祠

楊氏蔣鍾妻鍾歿楊方娠越四月遺腹生子成童而殤楊泣告夫靈曰立猶子妾力

撫之不餒君也又鉉妻歐陽氏鉉歿一子甫數月勵志誓守見重於姑同室多嫉之欲奪其志姑歿嫉者愈甚歐陽不爲屈及析箸分磽田二十餘畝操作教子其勤瘁有人所難堪者守節均歷數十年

鄭氏蔣宏範妻夫亡遺子一守節撫孤薄田數畝佐以紡織辛苦而終

王氏蔣學泗妻夫亡奉孀姑育孤子備歷艱苦守節三十年卒

黃氏蔣兆奎妻夫亡撫嗣子天驥至成立年七十二卒又兆鈞妻裴氏年十八歸兆鈞時寡姒黃氏守節無子裴事姒如姑生子勸夫爲兄立後未幾夫與子相繼亡與姒同志嫠居歷數十年

朱氏蔣克敬妻夫亡矢志不二其後復置祭田創修宗祠族黨稱之年七十四卒

郭氏蔣元新妻夫亡敬事翁姑撫嗣子教養兼盡苦節歷三十餘年

蔡氏蔣世瑚妻夫亡截髮矢志苦節歷四十餘年

龍氏蔣德昭妻同治元年賊至抱一女投水死

鄧氏蔣志祥妻夫亡苦節歷三十七年

蔡氏蔣成休妻年九十一歲

蔡氏蔣希邦妻國文之祖母也年九十五李氏蔣毓楚之曾祖母年九十三

楊氏蔣安順妻現年八十顧氏蔣安國妻現年八十一

王氏監生曹志大妻志大歿子光斗甫五歲食貧茹苦鍵戶紡績光斗稍長晝則令就外傅夜則躬親課讀光斗補諸生守節歷三十四年

金氏曹開照妾夫歿一子甫三歲矢志撫孤卒以成立治家禮法嚴整守節歷四十五年

馮氏諸生曹之欽妾年十六歸之欽與嫡葉相敬愛未幾夫亡無子有欲奪其志者百計逼之馮隨葉左右誓死不二終歲閉戶不與外通一日葉歸寧暴水忽至馮以嫡不在三日不移步人以爲餓死矣水落葉歸求之乃始共食清江楊尙書錫紱撰節婦傳纂入其事長洲沈文愨公德潛贊曰葉以青年矢志難矣馮年十六

尤難之難者也宅郢南街葉歸寧忽河水驟發鄉鄰俱奔避馮以葉不在獨不去抱嗣子幼女閉門坐樓上不食者三日昔魯伯姬宮中遇火保傳不至不出春秋賢之馮殆與伯姬先後輝映矣嗣子兆補諸生

魏氏曹正魁妻夫歿遺腹生男室如懸磬而能茹苦守約孝事其姑姑歿營葬兒長授學皆出於紡績縫紉之餘苦節歷三十四載

孫氏曹致中妻性純樸動止以禮不逮事舅姑而歲時致祭啼泣如初喪者數年生子士修士尙女子二而致中歿欲以身殉顧次子甫五日長老爭諭止之乃不死勤苦以立門戶長子旣娶婦復歿婦爲孝廉孫名泰之女即母之姪也士修旣死母旋病風飲食起居皆長婦爲扶掖左右之如是者數十年不懈士尙婦亦姓孫生子女各一而士尙又歿兩婦皆能持清操事病姑尤篤至姑婦三人嫠居一室相依倚如一人之身也以是里中稱節婦必曰三孫氏其後士尙女適謝姓者亦早寡復以節著貞節萃於一門亦足異已

蔡氏諸生曹一新母年九十八

蔣氏曹家桂妻夫亡無子秉義不回其妹適張某亦早寡有一子撫之至成立姊妹相依以織紉爲生守節皆歷四十餘年

戴氏龔輝先妻夫亡矢志自守孝於舅姑子一女二撫育婚嫁備極劬勞年八十五卒

李氏龔朝柱妻年二十九夫亡姑歿舅老竭力事之養生送死皆如禮撫子正澍兼撫弱叔朝宗朝宗補諸生正澍亦克自樹立其後朝宗歿復撫其孤如己出

胡氏龔嘉琇妻生子彌月夫亡毀容自誓孝事舅姑舅姑卒喪葬皆盡禮中遭劫盜及水患家徒壁立茹苦撫孤迄於成立守節三十餘年終

王氏龔弘祐妻幼知書通曉大義既嫁勸其夫力學弘祐歿撫孤子見淳竭力操作知見淳質魯教之耕織及孫稍長親授以句讀爲之訓詁俾知禮義而家計亦小康矣年八十餘卒娣姒有鄒氏者亦以節著

鄒氏諸生弘祉妻夫亡一子甫二歲守茅屋數椽晝紡夜績歲飢恒累日不舉火不丐貸於人孤稍長教之耕織用不匱於衣食苦節三十五年卒

劉氏龔則莊妻夫亡子家騏家駿撫至授室家騏婦李氏生子三家騏亡家駿婦朱氏結褵甫七月家駿歿旬餘朱嘔血死家騏長子鈺娶王氏次錦娶吳氏次鎧娶陳氏三子皆甫冠即歿王吳陳三婦均誓志無他與祖姑及姑各守節數十年天之所以待諸婦者不無過酷然一門三世六節婦其一且哭夫以死乾坤正氣賴茲長存固未爲不幸也

陳氏龔正華妻正華無賴子值歲大旱私以婦賣之某姓婦遂自溺於河邑令李題其棺曰節婦之柩

張氏龔筠妻朱氏龔代友妻皆守節歷數十年

王氏龔祖寬妻年八十一藍氏龔興熾妻年八十二

汪氏孫開業妻夫亡僅遺一女事姑克敬克孝立姪國楹爲嗣值歲歉兵興多方支

持以保厥家國楹娶婦謝氏生子煥國楹旋歿謝誓無他志姑婦相依完節以終
開業從子諸生國柱妻王氏亦以節著

王氏年十六歸國柱生子焯當于歸時舅姑先歿惟祖姑存婦孝養無缺國柱卒
矢志撫孤守節歷三十年

田氏孫良佐妻生子琢甫歲餘良佐歿勵志守節勤苦自給琢稍長訓誡綦嚴卒以
成立守節歷三十三年琢爲國學生

曹氏孫之茂妻夫亡一子二齡旋殤矢志不渝諸苦備嘗立嗣子承宗教育有成守
節歷三十八年

尤氏縣學生孫鯨海妻夫亡無子撫嗣子楚冲甫娶婦黃氏而歿黃遺腹生子誓無
他志順聽姑教以撫藐孤姑婦各守節數十年

楊氏例貢生孫之鏌妻夫亡無子立姪洙顧復倍股成立婚娶叠見孫曾年八十四
卒洙亦例貢生

梅氏孫存謙妻夫亡一子心純甫六月梅誓無二志盡屏繁飾雖執女紅惟縞素則爲之紅紫不以入手苦節歷五十一年

張氏國學生孫經壇之側室年將及笄經虧納之生女不育經虧亡志不可奪容毀骨立痛幾不生敬事嫡周氏愛恤嗣孫親族無間言迨嫡與嗣孫相繼亡兼之飢饉薦臻兵燹頻仍章操家計躬井臼艱苦備嘗處之宴如守節歷四十八年

馬氏孫思球妻守節歷三十六年

何氏孫克證婦遇賊怒罵賊刃之又盡禮女年十三被賊掠置馬上行至河邊投水死

蔡氏庠生國安女適孫裔榮裔榮以同治初遇賊殉難遺子安熙及女二蔡矢志撫之歷節四十餘年

郭氏彭述商妻夫亡無子冰霜自憫門庭闐然立姪澗爲嗣撫之嚴慈兼盡守節歷三十餘年

金氏彭志信妻夫亡絕粒長號誓欲同死顧堂上無所依遺孤復幼乃忍死復食仰事俯畜皆資紡績所出又志學妻李氏夫卒遺腹生女亦資紡績撫孤教以義方志謙妻伍氏夫亡無子撫嗣子迄於成立門內井然志敬妻謝氏夫亡誓無他志守節均歷數十年

王氏彭玉衡妻夫亡夫兄綸任江蘇金匱知縣欲迎之往王謂未亡人豈可遠離夫墓耶辭之苦節歷三十六年

朱氏彭杰妻夫亡撫嗣子鶴齡至成立嘗詔之曰吾堅貞守節匪言能罄爾知吾志凡遇孤寡當矜憐之苦節歷三十餘年鶴齡補諸生

趙氏彭正直妻夫亡遺腹生子撫之至成立苦節歷三十九年

朱氏彭思倫妻思倫赤貧傭工他出朱於稻田灌水猝遇強暴恐污力拒被毆斃擲水中經縣令蔡雪其冤申詳給金建坊於墓前

安氏彭其祥之子婦道光十四年九月初九日夜家遭回祿火延內室婦急奔戶外

旋念姑許氏與姑女未出入室救援須臾火熾三人俱斃

梅氏彭樹德妻年十五歸德樹生子一夫亡絕粒不食欲以身殉忽念舅姑在堂孤子無恃乃忍留竭力事畜無何舅姑繼歿子復殤梅曰吾今日乃可從夫地下矣
遂自縊時年二十四

黨氏彭次峯妻年二十九夫亡無子依弟苦守同治元年遇賊大罵賊怒支解之又
祥妻黃氏賊至被殺又有張氏者適彭夫亦名祥攜二女避亂遇賊被害

高氏彭耀聰妻祖華之母也耀聰年八十有四高年八十有七其後祖華亦得年八十有二高既躋耄耄夫與子亦同享上壽真一門人瑞也

李氏彭尊三母年八十一鄒氏武庠彭瑞林之母現年八十三

楊氏彭國培妻而立法院委員養光之母也性慈祥國培樂善好施皆楊有以助之
每值隆冬風雪大作念凍雀覓食無所置罌缶數十各盛粟米勺許排列簷端以
資羣喙至晴乃已鄉人稱其仁及禽鳥云

邵氏彭先進妻年九十有三又有黃氏者爲俊三之母年逾八十

邵氏彭國本妻許氏元愷妻易氏顯魁妻李氏耀洪妻皆節婦適彭氏之見於舊志者守節均歷數十年謹彙載於此

賴氏明貢生艾似芝妻似芝歿婦方娠早夜祈禱生男以延宗祀越三月生子睿值明季流寇標掠徧歷諸艱周防備至卒全身全家而保其孤年五十四卒睿婦康亦以節著

康氏保定知府正吉之女弟年十五歸睿越十二年睿歿矢節撫孤事孀姑賴氏備極色養其父居潛江頻遭水患迎養於家與兄妹同居外甥邱氏子五歲喪母引爲己子教育婚娶卒至成立守節歷五十年

張氏宣城教諭錫潤之妹適諸生艾兆鸞甫十月夫歿張方娠越二月生子繼宗撫至成立嚴慈並至井井有法門內肅然守節歷三十一年

馬氏艾士瑞妻士瑞歿子女各一教養兼至家雖饒裕時時以勤約爲教年八十八

卒同族鼎元妻甯氏青年守志年八十一而終亦守節而登上壽先後均題請旌表

周氏艾如檀妻夫亡無子或欲奪其志乃暫厝夫棺於室以絕之既而所立子又歿因悲痛喪明年七十四目復能視人以爲苦節之報年八十五卒又如貴妻李氏如瀚妻甯氏守節均歷數十年

殷氏艾逢榮妻夫亡家貧勤紡績以奉姑撫子至成立守節歷四十年又逢順妻殷氏逢升妻王氏守節均歷數十年

王氏艾之梅妻張氏艾澤洋妻閔氏艾文經妻守節均歷數十年

蕭氏艾家賢妻賊至與一女及從孫女攜手赴水死又家發妻李氏亦攜兒與女投水死

張氏楊氏諸生陶所材之側室先是所材於嗣妻李勸令置妾張楊先後來歸與李和集無間言楊生子泌三歲所材及李相繼亡時張年二十五楊年二十二同

心誓守僅留老嫗供事鍵戶紡績督家僕耕穫俱令老嫗傳呼於屏門外受命非
獻歲宗族子姪俱不得見泌長食餼於庠娶婦楊氏生子與泌又歿楊忍死撫孤
竭力盡孝輿援例爲國子監生張楊暨婦楊年皆七十餘歲卒有司表其閭曰一

門三節

周氏陶維漢妻維漢卒子昌五歲撫孤成立娶婦張氏生子以禮昌又亡張亦冰霜
自矢姑婦相依歷數十年完節以終

李姑許字諸生陶杰之子成藩將及笄成藩歿姑聞訃一慟幾絕欲奔喪父不許不
食累日父憐而許之遂留不歸守貞數十年年六十二而終

茹氏陶照妻生子一照歿矢志靡他日事紡績延師教子俾克成立年六十四卒

劉氏陶成蓮妻夫歿無子事舅姑稱孝苦節歷三十三年

陳氏陶正珩妻夫歿家貧紡績自給奉孀姑孝養不倦課子嶺楨令朝夕誦讀期於
有成苦節及三十年又正龍妻李氏夫亡舅姑皆年老家貧無以爲養一子幼乃

歎曰我非富室婦焉能坐食服穡采薪奚憚人見耶未幾舅姑相繼歿李哭失明謂子曰吾目雖盲思爾祖父母如在目前爾當敬體吾志也苦節四十五年又正鴻妻歐氏及從姪嶺楠妻雷氏均守節歷數十年

項氏諸生陶於濂妻夫亡家貧子宗藩幼晝夜紡績撫宗藩俾讀書以成先志守節歷四十八年

唐氏陶家振妻同治元年八月遇賊投水死

陳氏陶壽庭之母年九十二

嚴氏農家女民十六歸陶明源時土匪蜂起人人危懼嚴曰匪來即以死報之十八年果有大股匪至嚴被擄匪欲加辱嚴曰俟黃昏再曰候入室乘間跳河匪追及槍擊而死

蔣氏明諸生高翔妻而清初舉人長峯歲貢生岑之母也初翔歿長峯岑均幼蔣茹苦飲冰力支門戶鼎革後親見兩子成立蔣年七十三而卒

呂氏貢生高士輝之妾士輝歿呂年十九家人以其年少無出謀遣之呂觸柱流血誓不二詞意激烈遂全其志家故饒裕居恒足不踰閫日令婢媪取一飯布素終身雖姻黨不一面也守節歷十餘年

何氏高俊妻夫亡無子何曰無子命也守節義也卒擇嗣子立爲夫後苦節歷四十三年

郭氏高光聖妻夫亡撫嗣子澤珩至成立守節歷四十一年

王氏高正仙妻夫亡守節歷五十年年七十八無疾而終孫折桂補諸生

劉氏高同科妻夫亡無子家清貧惟姑在堂劉氏貞操以針黹度日奉姑極孝謹歲時歸省父母外未嘗他往守節歷三十年

杜長姑舉人理之女布政使官德之妹許字鞏昌太守高士熙之子嶽于歸有期而嶽遭疾且死長姑聞之悉斂平時所爲女紅毀之家人驚問故曰吾已無用此矣舅姑遺媪覘之長姑曰病不可爲當歸汝家歿吾世而已嶽卒乃請於父母縗服

往奠遂留喪次不歸舅姑憐而爲之置嗣嶽兄弟旣析居長姑獨持門戶養姑盡道撫教嗣子體恒篝燈課讀從旁指授之體恒卒爲諸生守貞歷四十三年

張姑幼字高安惠年十八安惠歿姑聞訃絕粒七日不死乃縗服歸高氏事姑以孝聞姑偶邁疾持齋默禱輒愈年八十八卒

許氏高發榮妻夫亡守節歷三十四年

蘇氏高元朗妻年二十五而寡有子順綱順常順倫及一女蘇歷盡艱辛撫順綱等次第成立女許字王氏子數年王父母相繼物故家產無存乃納王甥館以教以養王亦能成家室歷節四十餘年家道日興孫曾蔚起人皆以爲節孝之報云

陶氏高某妻某某母住皇城門年九十六歲又啟宗妻亦姓陶氏年八十六

周氏趙大友妻夫亡孤玠二歲攻半歲苦志鞠育事舅姑曲盡婦道舅歿喪葬盡禮時因病漸衰老然事姑孝謹有加諸子亦以次成立守節近五十年

武氏趙之鍾妻夫亡子德純七歲逾百日遺腹生子德洋矢志守節紡績度日其志

不渝舅年耄多病侍奉湯藥數年無倦色守節歷三十三年

張氏趙鏞妻二十而寡無子立嗣安貧矢志順於族姻里中稱爲賢守節歷五十九年

戴氏趙咸寧妻夫亡遺孤一義方訓子俾克成立苦節歷三十五年

張氏趙邦瑾妻夫亡撫子榮成立備歷艱苦守節歷三十餘年

胡氏趙正和妻歸正和四年夫亡有子三長立賢承祧叔氏次立志督令力學慈嚴兼至守節歷四十餘年

艾氏趙登元妻夫亡子六歲守志育孤教誨至於成立守節歷三十六年其後孫某娶婦延氏而歿延亦秉節能繼祖姑之志焉

吳氏趙德源妻夫故痛不欲生念方娠或可生男延一脉且舅姑衰老無人侍奉乃飲泣守志越四月生子必楷家赤貧紡績度日奉事舅姑婦代子職撫育孤兒母兼父道迨舅姑歿殯葬如禮子亦成立鄉黨賢之年六十卒

魯氏趙曰榜妻夫亡有欲奪其志者魯聞之遂自縊死

陳氏趙顯廷母年二十一而寡撫顯廷成立顯廷生子四均能承順鄉人以爲苦節之報年八十餘卒

李氏趙維亮妻遇賊携女投水死楊氏正宜妻賊至投水死又有趙氏者未詳所適亦遇賊投水死特附趙氏之後

陳氏趙宣昭妻鍾氏應春妻陳氏明有妻柳氏河妻皆節婦適趙氏之見於舊志者守節均歷數十年謹彙載於此

韓母孟氏韓世俊妻夫亡遺孤二家貧苦節自誓撫兩子成立年八十九卒孫三世明建中致中皆諸生世明生女二一適秦某夫亡無所歸依母家守節以終一適陳家穀早寡貧陋尤甚亦卓然自矢克完貞潔致中子家瓚娶楊氏家瓚妖楊茹冰飲血歷三十餘年卒自母而後其兩曾孫女一曾孫婦皆自致於孤苦困阨之地而不渝其操世皆以爲能嗣母之徽音云士俊弟士傑婦張氏其後又有士龍

婦劉氏皆以節著

張氏適士傑生子文炳士傑亡守節撫孤備極艱苦文炳補諸生旋歿婦鄭氏與姑同志立姪承祧以撫以教恩義兼盡年八十卒

劉氏適士龍旋寡遺腹生子早夜勤勞以撫藐孤孤長能讀書家業亦浸昌大守節歷三十年

張氏貢生韓文經妻事舅姑以孝聞文經卒僅遺一女矢志靡他偶歸寧父母欲令改適嚴詞以拒自是遂絕往來遭姑喪痛哭幾失明醫數年乃稍愈歲時祭祀輒不食累日嗣子世倂能養其志年八十餘卒乾隆五年旌表建坊學士楊炳以文紀之

張氏韓世鍾妻父歿事孀姑張無違節撫嗣子景雲督令力學補諸生守節歷三十餘年

范氏韓錫藩妻夫亡無子以再從姪佐才嗣翁痛子成疾家貧范力女紅佐藥資奉

養十餘年不倦又錫志妻楊氏亦早寡翁姑相繼歿克盡哀禮一女十齡復歿
煢獨立泣曰我雖生猶死而不即死者以我存死者尙得霑一奠耳苦節均歷數
十年

曹氏韓永福妻王氏韓大章妻王氏韓世傑妻均守節歷數十年

樊氏韓國櫟妻年十九歸未一年國櫟亡遺腹生子令典家貧恒取給十指間性
狷介雖三旬九食不肯稱貸於人守節凡五十一年同族有國淮妻劉氏及義典
妻王氏政典妻彭氏青年喪偶窮而益堅均與樊同劉撫姪桓典爲嗣守節歷三
十八年王僅生一女其父和育以畫名王承家學於花卉蟲鳥等物亦頗爲人所
賞凡女子出閣粧飾品往往倩王爲之因借是爲生活之資守節三十六年彭子
光裕以數月孤撫之成立既娶婦王氏生孫大勳而光裕又歿婦繼姑志兩世嫠
居尤爲族黨所稱

李氏年二十歸韓家麟二十九而寡生子三家貧竭力以奉舅姑禮不稍衰撫三子

成立守節四十七年督學王旌其廬曰節孝可風

陳氏武庠韓瑞林妻十四年歸生子光宜光德而瑞林卒時陳年尙十八含辛茹苦撫兩孤至於成立凡守節三十四年年五十二卒

蔡氏年十八歸韓國憲越四年國憲歿僅遺一女撫從子敕典爲嗣含辛茹痛躬自操作敕典旣娶婦生孫鋤口四方猶爲孫輩司浣濯及縫紉事現年六十計守節已三十八年矣

彭氏韓光鎔妻年二十一而寡有子一翁早逝姑老家貧恃彭針黹度日子長至十八歲又歿彭茹素禮佛年六十八而卒

陳氏韓本先之母青年守志潔身自愛壽九十有六

韓在功之母禮佛五十餘年年八十有四又國樞妻王氏年八十八國楠妻雷氏年

八十四國○妻雷氏年八十一錫朋妻唐氏年八十四永孚妻閔氏年八十五

王氏羅應達妻生子在京應達歿姑早卒先後繼姑三人王事之俱以禮督在京學

甚嚴年六十八卒又應瑞妻張氏笄年歸應瑞生子湘七歲而夫亡矢志育孤湘弱冠娶婦楊氏生子鳳翔亦七歲而湘卒楊氏克承姑志姑守節四十五年婦亦歷三十餘年

楊氏羅鵬翥妻夫亡窮約孤苦竭力以養舅姑撫孤子四人既長各授以生業守節歷四十一年

魏氏羅緒承妻夫亡矢志秉義以紡績爲生撫孤子至成立守節歷三十餘年

吳氏羅洵妻夫歿遺孤世永鞠而教之嚴慈兼盡以勤瘁立家守節歷四十八年

趙氏羅柄妻夫亡無子立姪爲嗣善事舅姑家甚貧以女紅自食鍵關卒歲守節歷三十五年

陳氏羅明科妻夫亡麻衣蓬首以終身苦節歷三十九年

趙氏羅國忻妻夫亡舅姑俱存家貧仰事俯畜以禮麵爲生嘗曰我雖勞所守者大且人不經磨礪何以立名節苦節歷四十年

王氏羅正楹妻夫亡撫二子成立既而長子亦夭婦歐氏與姑同志守節各歷三十餘年

鮑氏羅必暹妻年百有二歲學使旌其廬曰節壽永貞

楊氏羅與安妻同治元年遇賊被害

石氏羅學寬妻張氏行矩妻守節均歷數十年

羅姑父先美金港團人同治初捻匪竄境姑年及笄被擄將誘之苦拒不從賊刺其左臂且以刀鋒割入口中舌尖牙齦所餘無幾死之

孔氏羅登泰妻年八十六又劉氏夫某早故無子劉撫姪成立現年九十又吳氏諸生心泉妻現年八十有三

徐氏宋淳妻淳歿無子事姑至孝與同寢席借紡績以供甘旨有勢家遣女媒來徐懷利刃出持刃擬脰以死拒之苦節歷三十餘年雖比鄰未嘗聞其笑語聲也

劉氏宋之錦妻之錦歿惟餘一孤女家貧甚終年紡績自給親戚存問俱局戶不答

守節歷三十年之錦從兄弟之鎮妻戴氏及其子婦馬氏均以節著戴尤登上壽戴氏歸之鎮生子若淳而之鎮歿勵志自守家法整肅年八十卒若淳娶婦馬氏生子毓梅甫四歲若淳歿馬事孀姑撫弱息與姑同寢處寒暑不相離守節歷三十四年若淳從兄弟若灝妻魯氏亦以節著

魯氏歸若灝數載若灝歿魯方娠閱四月生子毓桂紡績教子守志不渝苦節歷三十餘年

劉四姑父應舉四姑許字松滋宋旻未笄而旻訃至即痛哭誓死持服三年父母婉勸之四姑以死拒父母相繼亡無兄弟惟以針黹自給忍飢不受親戚饋遺錚錚抱節歷四十餘年鄰嫗言其眉如男子黃毫被面人咸稱女中鐵漢云

王氏宋國棟妻定遠將軍王之富其高祖也年二十一歸國棟生子女各一子殤夫旋歿舅姑俱存家貧甚仰十指以爲養甘旨罔缺舅姑歿竭力營喪葬如禮守節歷三十餘年

李氏宋玫妻夫亡遺孤三齡艱難鞠育甫娶婦而歿復立嗣孫翊爲後歷遭挫折而志不少渝族黨稱焉守節逾四十年

王氏年十七歸宋士林甫七月而寡時祖舅姑及孀姑在堂夫弟尙幼忍死佐孀姑上事重闈下撫夫弟逮夫弟完婚生子開勳立爲夫嗣教養兼施視同己出周甲時蒙當途褒揚給予匾額并銀質褒章現年七十有四

陳氏宋銀妻年九十有四

李氏宋英強妻黃氏宋尙忠妻守節均歷數十年

朱氏阮氏楊氏皆宋姓婦同時遇賊投水死又有宋氏者未詳所適亦遇賊投水死特附宋氏之後

潘氏鄒景彥妻景彥歿倚墮田數畝自活撫兩子成人授室矣而次子及婦相繼亡無何長子亦故遺孤孫甫八歲撫育成立備極艱苦年七十三卒性剛嚴其姨子病崇潘過其家崇遂絕人傳其正氣足以懾邪魔云

李氏諸生鄒之瑀妻之瑀卒矢志自守撫孤子國仕督課甚嚴國仕卒克成立爲國子監生守節歷四十餘年又之瑛妻賴氏青年嫠居亦以節終

李氏鄒芳蘭妻夫故子生孟六歲事姑無違節訓勉孤子使力於學生孟得爲諸生守節歷二十年

大氏鄒恪妻生子士英歲餘恪故零丁孤苦守志不移年七十喪明鄉里敬而哀之守節歷五十年

王氏鄒聯耀妻結褵三載夫亡遺孤在抱守志不渝以紡織自給迨子成立學使胡旌其閭曰松柏同心先是聯耀祖母賴氏母劉氏俱青年守節鄒氏一綫賴以幸延聯耀弟婦殷氏從子婦傅氏曹氏亦以早寡克勵冰操人稱鄒氏四世節義之盛云

曾氏鄒國士妻國士歿事姑克孝治家以嚴肅育孤保節備歷險阻子爲諸生而歿教其孫亦有禮法守節歷四十四年

蔣氏鄒行德妻年八十二

宋氏鄒正績妻夫亡無子立姪爲嗣每訓嗣子曰我忍死撫汝惟望汝成人能承先志耳舅姑皆稱其孝苦節歷三十一年

周氏梅長春妻夫亡無子撫嗣運芳卓苦自矢守節歷三十八年長春從弟映春亦早世妻汪氏撫遺孤運開秉志懍懍不挫守節亦歷數十年

黃氏梅含容妻夫亡無子自守以禮族姻婚嫁終其身未嘗一至又宏容妻亦黃氏守節均歷四十四年

黃氏梅德學妻生子全吉德學歿遺腹復生次子事孀姑孝移衾同榻夢寐中猶呼姑被薄恐受寒巡撫胡題節孝垂芳額旌之

胡氏諸生梅泰初之側室先是泰初嫡妻嘗而無子娶妾周氏生子應春六歲而周亡續納胡時年十八性溫淑克勤克儉逾歲泰初歿嫡亦繼逝竭力營葬撫應春以養以教應春補諸生得紹父業苦節歷三十一年

李氏梅作華妻夫亡一子甫週歲撫至成立苦節歷三十四年

張氏梅某妻同治三年三月遇賊投水死

樊氏幼字梅本植本植年十二患腿成廢疾梅樊本世姻舅傳瑞慮異時貽節婦悔
示毀約意節婦父乃述女範宋女事以探其意節婦盛贊宋女並連誦不仁不義
何以爲人二語父知志不可奪遂不允所請年十七于歸及期而寡遺腹生子立
中時值祖舅姑暨舅姑均在堂舅筮仕山東祖舅逝世後侍祖姑及姑之舅任所
謹事重闈能得其歡無何舅患頭病腦脹欲裂節婦焚香乞禱刺指血書表告天
願以身代舅旋愈又數年舅卒於官率孤立中奉祖姑及姑扶舅喪回籍立中時
已十歲矣督課甚嚴偶遭疾立中或徘徊榻側必促令就塾或強起以示無恙祖
姑姑享年均高侍奉無一日或缺立中未冠補諸生旋登拔萃科皆得力於母教
也

劉氏年十九歸梅立國三年而寡誓以身殉旋因方娠未果及分娩胎以過哀死腹

中劉曰是誠無累可以如願矣一慟而卒

徐氏朱燠妻生子作銘未週歲夫歿時姑孀且老因喪子益病家貧餽粥不繼徐績緝佐甘旨事姑稱孝撫孤子成立備歷艱辛守節三十餘年卒

陳氏朱志杰妻夫亡子烈成七歲以針黹度日撫孤成立苦節歷四十餘年

蕭氏朱滋妻夫歿毀形明志苦節歷三十六年

蕭氏儒童朱法妻夫死守節乾隆四十一年請旌立坊於其墓前詳藝文碑目

李氏朱曰忠妻生子彬甫週歲夫歿矢志無他彬弱冠復歿更翼雛孫荼蓼備嘗守

節歷五十餘年

陳氏朱天志妻夫亡撫孤子心忠娶婦董氏旋歿董偕姑守節姑年八十卒婦守節

歷三十七年亦踰六十而終

劉氏朱起桂妻夫亡撫二子興茂興盛成立年八十一卒

李氏朱學禮妻年二十七同治元年遇賊携子投水死又大福妻田氏及家友子婦

田氏亦遇賊投水死

周氏歸朱明道年二十四而寡遺腹生子興典事姑撫子不辭艱難親族矜其苦節多爲依助度其可受受之否則婉言以謝興典旣成立爲娶婦常氏生孫二而興典歿時常年二十八誓繼姑志姑婦同節三黨皆爲引重周年逾八十常亦七十餘皆無疾而終

王氏朱安瀾妻年二十六而寡時子志勤甫二歲王勵志撫孤以養以教俾至於成人志勤有聲鄉閭間事親極孝又連生五子以娛堂上之歡族黨咸謂天之所以報節母云

游氏朱福田之妻苦節四十年某歲當途題孟徽遠紹扁額旌之

王氏朱正泰妻陳氏朱志清妻均現年八十一李氏朱炳文妻年九十八

陳氏朱士勤妻楊氏國治妻黃氏開甲妻黃氏有容妻符氏某妻周氏國珩妻宋氏先賢妻皆節婦適朱氏之見於舊志者事實雖不可攷其守節均歷數十年大半

題請旌表謹彙載於此

王氏蔡國祉妻國祉歿遺孤應相甫再週忍死撫孤歷四十三年終國祉弟春秀妻
蔣氏生子應奇六歲春秀亡與姒王苦節相依歷四十二年二節婦俱邑之蒿陂
人

毛氏蔡啟鸞妻幼養於舅姑及笄既成禮克盡婦道生三子啟鸞歿矢志撫孤躬執
勤苦生計稍裕而能輕財好施以承夫志棺槨錢帛之施里黨德之守節歷三十
餘年啟鸞從兄弟啟翼妻亦毛氏生子自敬三歲夫亡克勤克儉撫教孤子守節
歷二十七年

李氏蔡有登妻伯齡祖母守節四十餘年

黃氏蔡之華妻生子鈺數歲夫亡痛不欲生顧孤幼爲強起鈺稍長勉以力學督課
甚嚴鈺補諸生守節三十六年而終

汪氏蔡煥妻年八十四左氏蔡祥生妻年八十龔氏蔡福臣母謝氏蔡先禎妻均現

年八十一

劉氏蔡鵬妻夫亡無子撫姪國標爲嗣國標娶婦劉氏生子家馨家承而國標不祿
劉矢志自守事孀姑尤孝謹家馨由拔貢官無爲州知州人以爲兩世節孝之報
其後家承病逝妻黃氏能繼祖姑姑之志蓋薰染有自也同族有閻氏者國棟妻
夫亡事舅姑孝撫嗣子家鼎娶婦生孫家鼎旋逝婦吳氏與姑同守撫孤成立姑
婦各歷數十年以完節終又有國佐妻王氏家培妻李氏某妻陶氏均守節歷數
十年

陳氏沈承輿妻夫歿子憲紀六歲祇事孀姑教子有方比長娶婦陳氏生三孫憲紀
歿教督諸孫至於成立綜理家政門內井然守節歷四十九年

孔氏沈浩妻夫亡持躬持家悉有法度守節歷三十六年

于氏沈德隆妻夫歿子女各一人上事祖姑下撫弱息自祖姑養生送死至於男婚
女嫁皆一身任之無歎於志者守節三歷十五年

包氏監生沈均妻夫亡遺腹生子世儒勤苦撫教至於成立世儒業醫事母以孝聞
包年八十二卒孫傳一請於學使洪題亮節芳型額旌之

邱氏沈大貢妻夫亡舅歿惟姑存姑痛子夜不安寢邱含悲婉慰移榻姑側携子同
眠子啼輒抱坐待明恐驚姑寢族姻咸稱其孝年七十餘卒又大質妻陳氏夫亡
教二子外嚴內寬苦節歷五十五年

霍氏沈興讓妻夫亡以紡績養姑撫二子皆成人一日染沈疴次子光耀割肱和藥
進病良人愈人謂節母孝子萃於一門年七十六卒

伍氏沈光宗妻守節歷數十年

王氏沈宏科妻同治元年賊入境宏科被擄婦抱幼子投水死

李氏沈光庭之母現年百零二歲乙亥秋漢漲淹歿又有余氏者沈澤細之祖母現
年九十七

張氏杜文亮妻夫亡一子甫數月矢志守節竭力養姑撫子成立孫之琦補諸生年

六十七而卒

江氏杜國喬妻夫亡有子女各一勵志撫孤孤旋殤欲就死不食五日矣回顧幼女

在旁泣慘然復強起家酷貧采草根木實爲食而志不少挫守節歷三十三年

李氏諸生杜琮妻琮卒長子佐國二歲次宏國甫三月姑媼且老有挾勢欲強委禽者李毀容自誓懷利刃以死拒之杜氏宗族復利其產百計侵逼分畀以資乃已

二子稍長延名師丁孝廉巽來教之皆補諸生苦節四十年卒孫幽亦補諸生

邱氏杜崧妻夫亡無子立姪爲後盡心撫育子或疾終夜不寢苦節歷三十二年

周氏杜復興妻夫亡仰事俯畜竭盡心力苦節歷四十五年七十一卒

胡氏杜大連妻夫亡苦節歷四十一年

杜氏馬希融妻夫亡青年守志垂三十六年長子達早歿冢婦張氏次子适繼復不

祿介婦亦張氏俱同守節達子異眉甫娶而逝婦范氏誓承祖姑及諸姑志三世

四節同勵水操鄉里稱之達次子振之補諸生

熊氏諸生馬世勛妻世勛卒秉志不渝禮法嚴肅家政秩然子源能率其教戚族美之守節近四十年

朱氏馬士福妻夫亡家貧手織自給苦節歷四十三年

袁氏馬明蔚妻年十九而寡足不踰閫值夫忌日必設奠盡哀苦節二十餘年卒

徐氏馬學潤妻夫亡家貧至不能舉火徐勤紡織撫孤世賢成立苦節歷四十餘年

黃氏馬明琛妻夫亡家貧躬縫紉以撫孤子苦節三十餘年卒

王氏馬純妻項氏馬正欽妻袁氏馬光煦妻守節均歷數十年

褚氏馬某妻同治三年三月遇賊投水死又馬氏夫馬某賊至遇害

彭氏馬敷五妻年二十六而寡薄有產業擇嗣維艱閱七八載夫族弟悅來始出子

懋齡後之自立嗣後家政付之子媳惟含飴弄孫自娛暮景而已年六十八卒守

節四十餘年

文氏馬正盛妻年二十六而寡撫二子成立現年八十有三

唐孝女父澍歲貢生母劉氏女年十六母染病籲天請代一日病劇割肱和藥以進母疾尋瘳忍痛服侍不倦父母察其肱垂不舉方加調治割痕歷久猶存梳洗操作均須人代後歸副榜張國楨侍奉舅姑倍得歡心鄉里稱之

按本編雖以夫姓為綱孝女事有專

屬故以母姓係之

張氏唐正妻夫亡遺一子甫數月族人以羸弱為憂張曰賴祖若父之靈幸無害益為厚德事以籲冥佑卒撫子成立為娶婦至老孫曾繞膝苦節七十四年年九十四卒唐氏又有名正者婦亦張氏文藻之女文藻教女有禮法婦歸正四載而寡惟餘一子守節歷三十七年

鄧氏唐榮封妻夫亡苦節歷六十二年八十四卒

鮑氏唐金玉妻夫亡遺一女家貧僅有園數弓婦曰我之死靡他天以此贊我也朝播種夕灌溉植蟲穴為圃者皆告饑而婦蔬蓂然所獲獨厚已稍有儲積乃立嗣子為夫後苦節歷四十三年

李氏唐安廉妻賊至抱幼女與其子婦俱投水死

王氏唐作棟妻陳氏作棟弟作樑妻作棟兄弟先後逝兩婦同勵冰霜守節均歷數十年

王氏唐安金妻守節歷數十年

陳氏范廷相妻幼爲養媳於范比長成婚生子士勳在襁褓廷相歿家貧舅姑老陳晨起磴麥夜績麻以供舅姑如是者八年而舅姑歿能盡哀禮士勳亦克遵母訓讀書循禮雍正四年鄰居有老諸生劉廷森者篤行君子也率同里言之官注冊題坊

陳氏范元芳妻夫故三子俱幼備嘗艱苦鞠諸孤以次長成事孀姑孝養尤至又元觀妻亦陳氏元觀歿一女甫八月以姪述淹爲嗣述淹長以孝聞守節均歷四十餘年

陳氏范某妻夫亡撫嗣子光宗旣娶婦生孫矣而光宗歿復撫其孫年八十一獲見

曾孫而卒

葛氏范汝薰妻夫亡祇事舅姑撫孤子兆椿至成立苦節歷四十八年

張氏范尙榮妻夫亡守節歷三十二年

田氏范士品妻同治三年賊竄郢南赴河西避亂至河岸未及渡賊大至遂投河死

又兆忠女年十三賊至亦投水死

李氏范自誠妻生子嵩山而自誠歿時年二十四撫嵩山成立病劇時嵩山割臂以

療母節子孝鄉黨稱之年七十卒守節四十餘年

韓氏范崇福妻年八十有二

徐氏年及笄歸范自德踰年自德亡遺腹生子堯天家無長物惟晝夜紡績以爲事

畜之資年七十九卒守節五十三年

張氏魏文麟妻夫亡子宗相六歲勵志守義孝養舅姑甘旨罔缺延師教子修脯必

豐然自奉絕清苦年五十六終宗相賴母教補諸生

王氏魏之淳妻結褵三年生一子之淳歿將殮王痛欲身殉之淳忽張目視父母及孤子淚數行下王悟乃截髮納之淳手以明其志目乃暝後孤子七齡而歿立姪爲嗣復歿舅姑相繼歿閉戶紡績即兄弟罕睹其面苦節歷三十餘年

胡氏魏尙義妻歸尙義六年生一子夫亡子亦歿立嗣撫至成立又歿乃育三歲嗣孫孤苦勤勞至於授學應試皆竭力爲之年八十卒

賈氏監生魏國柱妻夫亡撫孤經理家政內外秩如年八十餘猶晨起率家人力作孤子燦爲監生早歿教孫亦有法度里黨稱之

朱氏魏萬年妻夫亡舅姑俱存織蓆爲生活如也年九十二卒

周氏魏光煥妻光煥弟光甲妻亦周氏光煥兄弟相繼卒兩婦均守節歷數十年

江氏魏秉魯妻年二十五同治元年賊至溺死

魏氏太學生魏兆雄之母年八十五

歐氏太學生魏兆雄繼室十七于歸十年而寡有子天祿前室朱所出歐愛逾親生

當兆雄病亟時天祿雖幼嘗割臂和藥以進其於歐亦能竭力以奉族黨咸謂歐之賢慈有以致之兆雄既沒歐上事衰姑下撫天祿守節凡四十七年

呂氏賓州知州承亮之女歸監生熊若麒生子鉦數月若麒卒矢志苦守竭力以奉舅姑親課其子每殘夜篝燈鄰人聞啣唔聲與織作聲相間也鉦爲國子監生

楊氏熊天榮妻天榮亡僅遺一女家貧躬紡績以養舅姑鄉里咸稱其孝守節歷三十三年

孔氏熊士訓妻夫亡一子甫再週痛欲殉夫懸帛而斷者數次乃歎曰天不亡我我今悟矣我死如夫後何撫孤子成立子以孝稱苦節歷三十九年

郭氏熊鳴謙妻年十九于歸越六年生子女各一而寡養姑教子矢志不渝姑享年高嘗語人曰吾無子而樂不減於有子時此吾媳之力也年七十八卒凡守節五十二年

史氏熊志周妻夫亡性幽靜動作語默悉奉女箴苦節歷四十八年

曾氏熊永鏐妻陶氏自榮妻史氏開笈妻守節均歷數十年

某氏熊某妻同治元年閏八月遇賊與陳維馨妻李氏同投水死

周氏郭廷誘妻夫亡家貧無子苦志無他守節歷三十年

常氏監生郭世鉅妻副榜道凝之姊幼稟家訓知大義歸世鉅生三子俱幼世鉅卒截髮矢志事姑稱孝撫孤次第成立持家有法內外肅然子正德補諸生守節歷三十餘年

王氏郭紹聞妻夫亡家貧勤儉自持孝事舅姑撫二子皆成立得見孫曾年八十五卒又紹元妻常氏亦以節著

常氏歸紹元數年生一子夫亡撫藐孤成立乃曰郭氏禋祀有託矣我心惕惕數十載今而後庶告無罪於地下乎守節垂四十二年

蔡氏郭能增妻夫亡遺孤甫彌月奉姑撫子訖能有成守節歷三十一年

楊氏郭之華妻鄧氏曰寬妻守節均歷數十年

陸氏郭能墀妻年十七同治三年官軍駐郢有卒潛入其家見陸貌欲污之陸大罵卒割耳去陸投劉公井死卒亦就法

柏氏年十六歸郭世焯八十日而世焯亡苦志勵節茹素終身凡三十餘年族黨欽之

羅氏諸生鍾邦傑妻邦傑歿子潮三歲奉孀姑育孤子艱苦萬狀矢志彌堅潮娶婦戴氏復早世戴亦以節著

戴氏年十八歸潮自幼頗知書進退以禮事孀姑有至性姑甚愛之潮歿遺三子守志撫孤督教甚嚴長子元梓國子監生能體母志居家孝友次自修督學使胡取入府學因額滿見遺後八年督學使吳卒取入縣學有贈聯云雙節一門光女史八年兩次列宮牆

趙氏鍾燧妻夫亡遺腹生子國光撫之成立年八十七卒

陳氏鍾誠記妻年九十二

趙氏鍾光燠妻賴氏恒遠妻賴氏諸生榮廷妻錢氏光廷妻別氏正朝妻皆節婦適
鍾氏之見於舊志者事寔雖不可考其守節均歷數十年大半題請旌表謹彙載
於此

茹氏樊繼緒妻夫亡家貧而秉志不渝督孤子力學植行能束身禮法族黨敬之守
節歷四十六年

劉氏樊世寧妻夫亡遺孤保傳後更名登培劉嫠居後以禮自防足不踰閫者四十
餘年間遭疾危甚家人欲延醫診視峻却之曰死生命也未亡人奈何以手示醫
乎撫孤慈嚴兼盡舅明經若谷翼孫授讀輒於課餘勛以勤苦不少假孤例授浙
江龍游縣丞諸孫清元清輝清印均能振其家聲蓋母德之垂蔭遠矣世寧從弟
世檢妻楊氏從子燧傳妻孫氏均守節歷數十年從孫清徽側室張尤以節著
張氏年十七歸清徽生子啟正十年清徽亡啟正甫五齡與嫡庾氏共撫之至於
成立苦節歷三十餘年

李氏樊賜麟妻夫亡守節歷四十一年

張氏樊典傳妻舉人履德之女守節五十餘年同治元年八月同姪婦樊氏蔡氏殉難於葉家嶺

劉氏樊仁山祖母年一百零一歲

關氏舉人棟次女適樊渠正生子家塏甫三歲而渠正亡家貧恃針黹度日卒撫家塏成立守節歷三十年家塏有女二姑幼字張姓張子夭二姑仰藥自盡鄉人以爲能稟節婦之教云

李氏樊純正妻年二十而寡遺腹生子家福操守清潔苦節歷三十三載

高氏國林妻國林歿高年二十六遺一子矢志撫孤旋又疾歿茹素禮佛不苟言笑壽八十六而終守節凡六十年

周氏潘朝瑞妻處士文寧之女幼嫻閨訓于歸三月朝瑞歿無子婦欲殉顧不忍孀姑無侍奉且祖姑猶存乃以義自抑孤苦厲志躬紡織以終孝養里黨賢之

孟氏潘學廉妻歸學廉生子大典甫週歲夫亡仰事俯畜備極劬勞舅姑憫而賢之苦節歷三十年又學善妻魯氏夫亡家貧夫弟欲助之辭曰叔非素豐未亡人豈以衣食累人者力女紅以自給苦節歷數十年

李氏潘寅妻易氏潘家谷妻鄧氏潘朝興妻鄧氏潘正榮妻守節均歷數十年

潘氏夫亦潘姓名大祥夫亡無子守節十四年女二長珍姑年十七次團姑年十四咸豐四年賊至婦扶姑携二女逃入西山賊躡至遂辭姑與二女各抱石投水未幾賊去鄉人救出次女獲甦婦與長女已無及矣

朱氏監生金汝震妻夫亡子維綱甫彌月家貧朱竭力經營孝事孀姑鞠育孤子鄉里稱節孝焉年七十餘卒

孫氏金維綬妻夫亡一痛幾絕以舅姑老抑哀以奉孝養備至教育嗣子文昭循循有禮卒年四十五以守節未滿三十年格於例不及請旌鄉里惜之

李氏金達繼妻夫亡誓無他志子述賢娶婦歐氏述賢歿孫繼祖娶婦李氏繼祖亦

不祿歐李均秉義不回克嗣徽音三世並經旌表

王氏金清學妻賊至攜二子投水死其夫姊金氏與弟婦魏氏曹氏俱投水死

董氏金惠安妻現年八十八

羅氏謝啟祥妻啟祥歿勵志撫孤孝養舅姑以儉穀嚴正自將雖老而親族罕睹其面守節歷四十餘年又啟程妻亦羅氏夫歿子方在抱矢志靡他事舅育孤咸能盡道守節亦歷四十餘年

尹氏謝生瑛妻夫歿遺子女三勵志守義事舅姑極孝蔬食終身紡績恆達旦有小叔誕而無乳姑欲棄之婦慨然抱留哺以餒餌得存活族黨尤稱之守節歷四十六年

劉氏謝文綸妻夫亡遺腹生子家貧育孤備嘗荼苦巡撫胡旌其閭曰節媿松筠

羅氏謝玉華妻夫亡舅姑相繼歿竭力營葬撫諸孤次第成人苦節歷三十九年

戴氏謝世英妻夫亡苦節五十一年年七十八卒

謝姑光英女年十五賊掠置馬上故墜賊殺之

劉氏常有訓妻夫亡無子立姪為嗣守節歷四十五年

黃氏常炳妻夫亡撫子文藻娶婦朱氏文藻旋歿姑婦共勵清操姑年六十六婦守

節亦歷三十餘年

張氏常植妻夫亡苦節歷五十四年年八十卒

郭氏常鴻祺妻何氏常榜妻袁氏常文富妻守節均歷數十年

張氏馮塏妻夫亡遺腹生子矢志撫孤事孀姑稱孝守節歷四十一年

李氏南滙令兆鉉女歸監生馮良檜四年夫亡遺腹生子炎苦節三十六年而終

李氏馮必達妻夫亡撫二孤以次成立勤女紅以自給年八十八而終

溫氏馮希元妻夫亡撫孤子智奇治家有法苦節五十二年終身未嘗見齒

張氏馮學錦妻學錦病卒張以身殉

劉氏馮光甲妻夫亡苦節歷三十五年

李氏邵國玠妻夫亡誓志撫孤長世錦不幸早歿次世銓娶婦張氏復歿有子一姑婦同撫弱息冰蘖共勵姑守節四十六年婦亦踰三十年

楊氏邵明英妻尤氏邵朝經妻劉氏邵元祖妻守節均歷數十年

張金姑聯陞女幼許字邵世錦將嫁世錦病卒姑聞之飲泣不言向夕閉戶自經死

康熙五十三年旌表

劉氏邵起鵬妻年二十來歸越歲起鵬卒舅姑哭之痛姑絕而復蘇臥床無一語劉願終事舅姑截髮以誓無何舅置側室生子建侯妾旋歿姑指建侯謂劉曰此邵氏一線之脉我病且殆不任鞠育之勞長嫂如母於汝乎是賴劉敬受命時建侯飢寒而衣食之往鄰里或移晷迭遣僮僕迎迓建侯稍長百計誘其嚮學并勸以四方志俾出外就傅園熟一果遠方餽一珍必度焉以待逮建侯受室生子劉始稍稍弛責然於門以內事輒以一身任之未敢稍自暇逸卒年六十九以建侯子復楚爲嗣建侯請旌於朝并乞拔萃劉先覺爲文以表其墓

曹氏石將軍佩玉之妾年二十歸佩玉佩玉病亟謂之曰汝年少我死後宜擇所適曹叩頭泣血曰妾雖賤亦聞從一而終之義何敢背遂截髮以示無他佩玉卒曹毀容持服服闋家人復勸之以死自誓竟蔬食紡績以老其嫡子游擊思璠與其婦敬事之守節歷數十年

蕭氏石思永妻子尙忠數月夫歿矢志自守躬紡績以撫孤守節歷三十年

陳氏石雁信妻夫亡家甚貧而秉志不渝以姪潤承嗣潤頗能養年八十卒

戴氏石兆綵妻夫亡遺一女家無立錫地織蓆爲生晝夜操作始終不渝苦節歷四十二年

張氏石某妻夫亡撫子長庚至成人苦節歷三十八年

李氏石欽妻夫亡苦節歷三十年

胡氏石登府妻年八十九又登州妻解氏現年九十

鍾祥縣志卷之二十七

列女傳四



董氏萬世鵬妻笄年歸世鵬生一子夫亡守節歷三十四年

華氏萬里妻里卒竟日哀號語人曰誓不獨生乘間投水死

王氏萬國株妻夫歿哀毀骨立孤子二教以耕讀家政肅然守節歷五十餘年

潘氏萬文學妻夫亡子幼值歲荒有勸改適者詈絕之杜門紡織教子成人苦節歷

四十四年又文炳妻王氏夫亡撫遺腹子運盛備歷艱辛守節亦踰五十年

劉氏萬文榜妻同治五年賊至負子攜女而逃遇賊不屈死子女亦被害

謝氏汪廷元妻夫歿遺一女既嫁而歿孤苦零丁茹荼如飴守節歷三十八年

魏氏汪正開妻夫亡有子女各一食貧守義事姑養生送死如禮孤子既成立而歿

依嗣孫以居遂窮阨終身年八十一卒

龍氏汪開選妻性賢淑夫亡遺孤賜豐甫週歲家中落以女紅自給賜豐長教以詩

書補諸生苦節歷三十三年

陳氏汪時鈔妻同治元年九月遇賊投水死

姚氏汪國琪妻王氏得訓妻守節均歷數十年

陳氏汪世楨妻年二十歸世楨生子學濬學澍而士楨亡時年二十六撫二子成立學濬娶甯氏學澍娶劉氏無何相繼歿甯一子曰士甲劉無出娣姒同依孀姑撫士甲成立母年八十六以壽終其後士甲婦李氏又以節著

李氏三十而寡遺腹生子洪澣李以祖姑姑皆青年守節誓無他志謹事重闈而嚴以督子子游庠有聲而勤約如故家日起推所有以周濟困乏三黨胥蒙其惠卒年八十有四其後洪澣次子宗炎娶梅氏宗炎亡梅年十九遺腹生一女梅以累世貞節上紹家風守節二十餘年而卒又有黃氏者爲士甲族弟士斌之後妻亦以節著

黃氏年二十歸士斌士斌前妻遺女二黃撫如已出越五歲生子汲塘及二女而

士斌卒士斌故饒於財性揮霍存時已耗其半歿後連遭訟累家益落黃竭力措
撐延師課汲塘讀汲塘馳驟名場頗有聲然豪宕不羈黃謂宜擇善而遷乃依族
兄洪湏居得保先緒於不墜黃守節四十六年

又有楊氏者士魁妻十六于歸十九而寡家故貧楊誓死靡他佐舅姑以勤儉治
家立從子光耀承祧年七十六卒凡守節五十七年

曾氏年十七歸汪宗池越六年宗池歿遺女二無子時舅姑在堂爲立從子星臣承
祧仰事俯蓄備歷艱辛年六十六卒凡守節四十三年

張氏汪世傳妻性端淑世傳倚教讀爲生婦採薪度日育蠶營生家日起子樹清樹
勳皆補諸生年八十六而終

彭氏汪汲塘妻年百歲賀大令作霖撰聯致祝云五世幸同堂知諸孫種種烏私陳
情有願百年曰上壽羨夫人綿綿鶴算介福無疆

董氏名鳳雛父玉如以義聲著鄉里鳳雛歸汪相曾爲繼室生子德鈞女德芳相曾

前妻所生子名德鎭鳳雛亦視如己出民十六相曾被匪駭死鳳雛獨持門戶以教子女自任十九年鍾匪志超掠德鎭德鈞去鳳雛泣懇父玉如援救玉如籌款贖回二十一年紅匪突至鳳雛被擄奮口罵匪而死子女遂往依玉如然則鳳雛節烈可欽玉如殆亦可風焉

李氏傅祥祚妻祥祚歿忍死撫孤俾至成立守節歷四十五年

張氏傅作懋妻結褵三年夫亡苦節踰三十年又周氏傅某妻守節歷五十年

胡氏傅燦妻年十八夫亡一子甫數月矢志撫孤茹荼含辛晏如也苦節六十餘年八十卒

張氏傅業儒妻明大義夫亡事孀姑撫遺孤心力交瘁以勞致疾年未五十而終

邱氏傅廉臣妻同治六年四月賊至溺死又余氏傅國龍妻賊至投水死

劉氏連璠妻明經晟之女歸璠生一子歲餘夫歿上無舅姑旁鮮伯叔矢志堅守以育藐孤年八十餘卒

劉氏監生連洲妻諸生正壇之長女幼嫻內則動止以禮歸洲生二子一女夫歿矢志撫孤持家有法子稍長延師課讀禮敬有加居常和厚整肅族黨稱焉長子希相監生次希杰縣學生

楊氏連希齡妻王氏連徽妻張氏連文霖妻守節均歷數十年

曹氏連國貴妻賊至被害

李氏涂相妻兆齡兆書等之母也少習詩書明大義相兄弟二析產後別購宅經營締造煥然一新兄以子衆多思得相宅未便明言李窺其意勸相讓之生兆齡等四及女二以詩書課子以針黹教女兆齡兄弟均以經明行修爲鄉里衿式兩女各適士族有賢聲再傳後諸孫婦多以節著

蔣氏李孫婦附貢生士青妻也歸士青踰二歲士青遠宦適流寇充斥姑命赴母家避亂一日賊突至擄婦女七八閉之一室而去蔣約衆推門而逃以炊烟和牛糞塗面藏荊棘中兩晝夜獲免又一日遙見賊至急竄亂山中逮暮見一小村借

戶外破碾中棲止主人延之入堅不肯翌辰僕跡至始歸亂平士青歸不數歲歿子伊蔚甫數歲質弱多病蔣飲泣調治然疾愈輒督學或述古人嘉言懿行以相勸伊蔚故誠篤稟母教益深自砥礪卒以學行為鄉閭矜式蔣嘗患病劇伊蔚潛割肱和藥以進病立瘳鄉人以節母孝子萃於一門傳爲美談伊蔚嘗問避亂時宿某村戶外主人再三請何以不入蔣謂予倉皇投彼不知係何人家豈可孟浪其有識如此蔣從姒蔡氏從姪婦張氏吳氏王氏李氏均守節而王李尤著

王氏年二十二歸文蔚文蔚少孤母與長兄復相繼歿嫂吳氏旣寡撫女度日文蔚困童子試依諸叔爲生王來歸請迎寡姒同居姒却之然隨時存問視姪女如己出族黨皆稱其賢數年文蔚補諸生生女二而文蔚忽以瘵卒王慟絕久之始甦回顧孤女在側遂不忍言死營葬畢資紡績自活苦節歷四十餘年

李氏歸傳烈數載生子女各一傳烈卒家貧無以爲生李縫紉紡績晝夜弗輟子數歲忽成廢疾李仰天泣曰未亡人不足恤何吾夫之竟不獲延其祀也然矢志

益堅族黨咸憐而敬之女適諸生程洛同族有黃氏者尤以烈聞

黃氏士傑之妻先是士傑父官守備家尙盛黃父與爲婚無何士傑失怙恃家中落黃父有毀婚意未敢遽言及完婚有日士傑忽大病兼以周身惡瘡黃父乃倩媒妁向士傑諸父道其意婦聞之與其父力爭誓無他志父不能奪乃草草遣嫁士傑病劇不能成禮婦百端調治衣不解帶者三月士傑卒不起婦向士傑諸父丐得棺衾葬訖自縊死

杜氏程世楫妻歸世楫奉舅姑維謹生子二女一世楫歿有以家貧勸其改適者杜厲色曰餓死事小失節事大况有藐孤可依耶苦節歷四十六年

朱氏程述義妻同治元年遇賊抱子攜女投水死

涂氏廩貢生兆書女笄年適程光甲程故世族饒於財光甲父述緒早歲補諸生酷嗜書光甲隨父讀益不問家事一聽臧獲輩所爲家日落洪楊亂作展轉遷徙遂不支浸至無立錐地涂歸數載光甲歿遺孤茂先甫半歲晝夜勤女紅以資家用

時姑已逝世舅抑鬱致疾呻吟床褥者年餘涂服侍周至中夜溺器皆躬爲浣滌夫弟某攜室他居絕不一顧涂黽勉獨爲其難毫無怨言舅卒營葬畢乃歸依母家督茂先學洎茂先授室始賃宅他徙茂先連舉數男次洛絕聰慧嘗撫洛詔茂先曰吾歷百艱撫汝汝復踳踳名場異日能酬予節而償汝志者其將寄此子乎年六十四卒

王氏年十七歸程燕數月燕亡翁姑僅燕一子痛不欲生王體翁意強顏承歡立嗣安宜撫之卒成門戶年七十六守節近五十年

孫氏諸生秦睿哲繼室也有操行才識尤過人初歸睿哲撫前室子珩若已出睿哲卒珩已成立爲選拔生矣無何珩夫婦相繼歿長孫恂八歲次孫怡二歲依孫爲命時值滇黔之變差徭方殷重以族黨凌侮多方謀奪其產孫不動聲色但申戒僮僕無撻其鋒約束佃民無入其黨執契清界先期納糧銷弭奸萌羣小屏息撫兩孤孫成立卒全其家鄉人稱其有功於秦宗焉從子瑤有聘婦吳大姑以貞烈

著

吳大姑諸生世貞女幼許字益哲之子瑤瑤歿姑年十八聞耗痛絕其母救之良久乃甦起謂母曰秦氏子固無恙遂輟哭母不之防也入夜自縊死兩家父母憐之俾合葬焉

蔣氏秦銓妻銓卒遺孤震元震亨俱藐蔣冰槩自甘尤善持門戶事孀姑無違節教督諸子禮法肅然同族有士安妻劉氏守節亦歷數十年

陸母梁氏安溪令光祖之繼室夫亡所有衣飾悉散與諸婦服荆布茹藜藿經紀家政毫髮就理又闢別墅延名師衛良佐鶴洲教其子錦昶讀禮敬有加錦昶卒以學行受知高安朱文端公文端時令潛江每公事入郡城輒式其廬嘗語鶴洲曰陸母今之陶母也年九十二且卒檢笥篋僅釵一支衣一襲示子孫曰此幼年所受聘物存之所以見予志也言訖瞑目從婦陶氏亦以節著

陶氏爲錦耀側室錦耀官賓州吏目卒於官陶生子定淮甫五歲矢志堅守嫡孫

氏賢之遂與同撫藐孤教育至成立守節歷三十四年

劉氏陸尙賢妻夫亡遺孤一撫之成立守節歷四十二年同族炯妻嚴氏守節亦歷三十餘年

黃氏董維藩妻維藩歿家極貧黃所歷艱苦萬狀未嘗語人即父母昆弟亦不使知之蓋狷介貞靜其天性然也卒撫子成立用奠厥家守節四十二年七十一卒李氏董士元妻夫亡家貧以女紅自給苦節踰三十年

鄭氏董學浩妻歸學浩生女以貧故爲富室乳子夫亡立志不入富貴之門躬紡紆以自給苦節歷三十年

劉氏董國臨妻夫亡家貧無子或諷以改適劉誓曰海枯石爛此節不移其後以窘迫萬狀無以自存乃痛哭閉戶投繯死

李氏董道蘊妻夫亡決志殉初不哭姑以義責之李曰夫已死哭之無益也夜半遂自縊於室學使馮旌其廬曰倚蘭香烈

王氏董兆美妻年二十四而寡家中產婦撫子女不茹葷酒勤儉過於夫在之日鄉黨尊爲女範守節四十餘年

鄭氏歸董正均生子女各一先後殤無何正均歿鄭年方二十六誓無他志撫從子爲嗣含辛茹苦卒成其家年八十以壽終鄉人爲建節孝碑

杜氏董策先之妻現年八十四歲

李氏董先奎母現年八十四歲

杜氏鮑國欽妻夫亡子二長正珠次正玉及冠祝之曰珠媚於川光必自發玉蘊於石琢然後成顧名思義勿自棄也年八十三卒國欽從兄弟國成妻丁氏國典妻周氏均以節著

丁氏笄年適國成年二十四夫亡苦節歷四十餘年

周氏笄年適國典越歲夫亡將殉忽念姑衰老乃已撫嗣子履端承夫祀稍長以孝教之苦節歷五十二年

杜氏鮑嘉惠妻夫歿無子立嗣撫之教以義方苦節五十餘年卒

胡氏鮑榮祖妻咸豐四年避亂石牌市西匿高宅賊入罵賊不屈死

陸氏安溪令光祖之女歸向楷生子必傳楷歿遺腹復生子忍死撫兩孤成立閉戶

紡績雖至親罕覩其面守節歷四十三年

程氏歸向錫文四年而寡有子二矢志撫孤訖於有成守節四十八年終

李氏向起有妻劉氏向珍妻均守節歷數十年

鄒氏向文庚之妻年十六歸文庚越二歲生子善甫而文庚歿矢志撫孤娶媳某氏而善甫旋歿遺腹生孫復與寡媳同撫孫成立現年六十四歲計守節已四十六

年矣

劉氏武生向金魁之母故節婦也賊至遇害學使題額旌之

盧氏向文英母年八十

彭氏監生余世鏞妻幼事繼母以孝聞歸世鏞數年夫故勵志守節嚴督諸子長宗

涓爲諸生有聲次宗濟宗漳師事長兄皆能自力於學

魏氏監生余鈞妻夫歿無子毅然矢志力持門戶以姪之瀚爲嗣之瀚亦克孝守節

歷三十九年

劉氏余際乾妻年十九夫亡撫孤子成立自初寡以迄於耄年足未嘗出戶庭年九十而終

梅氏余文煜妻夫亡苦節歷四十六年

余姑文德之女賊至投水死

金氏余天曉妻現年八十一

李氏游大椿妻增生春藻長女也幼知書嫻內則歸大椿爲繼室生子柏齡女三人督耕課織治家有法游氏世以武功顯娶族居名游家集距縣治四十里民國二十一年夏赤禍蔓延逼近游家集柏齡携妻子遠避李獨支門戶賊至掠李去索厚值待贖李朝夕罵賊曰老身惟有一死胡不速殺賊姑置之將待其子之祈請

也越數日柏齡漫無籌畫而李罵賊益厲賊斬之鄉人收其尸竟覓首不獲嗚呼
慘矣時年七十四

楊氏游範杰妻陳氏游子一妻守節均歷數十年

宋氏笄年適諸生賀聖佐生二子先後歿夫旋物故時宋年甫二十取夫結褵帶置
懷袖中將死之其姑防守甚嚴不得間徐諭以立嗣大義爲立姪以慰安其意乃
已居無何嗣子復殤時宋已守節十年矣強自抑若不甚悲者一夕闔戶沐浴仍
取前結褵帶自經死聖佐從兄弟賢佐婦曾氏天佐婦王氏均以節著乾隆四年
三婦同時旌表又有監生伊佐婦王氏舊志僅載守節年歲其事實則不可攷也
曾氏沅州學正明之女適賢佐二載而寡生一女復歿子身誓守足不踰闕遭姑
歿哀毀骨立苦節歷三十餘年

王氏笄年歸天佐二十二天佐歿矢志守節內外無間言事舅姑尤孝謹姑倍憐
之撫嗣子熙祖恩義倍至年六十五卒

丁氏廩生賀鳳鳴貢生賀鳳儀之曾祖母年九十六

吳氏雷與參妻事孀姑謹每母家饋遺盡獻姑所不敢私姑病夜祈天請代夫亡慟絕數四諸娣哀之代理家政服闋仍請其主持喜施與鄰里困乏多資之教督諸子無少貸長子怡監生次惇縣學生次愉亦能自立

張氏諸生雷大鵬妻大鵬卒遺孤二俱藐張矢志撫孤日勤紡織食貧守義鄉黨賢之長子杰讀書養志爲諸生次瑛亦自立

涂氏雷正珠妻諸生兆穉之女兆穉兄弟四諸女以十數婦幼端凝喜讀書獨與從姊適劉適程及中表何姊適李諸人時以故籍所載諸女行相勗勉年二十歸正珠甫數月避亂遇賊奮身投水死其後適劉程李內外諸姊均以節著於鄉里惟婦死爲最烈云

樊氏雷國蔭妻夫亡守節歷四十年

郭氏廩膳生雷正鳴妻正鳴卒郭年二十五方娠越六月生子崇傑備歷艱辛矢志

不渝崇傑既成立宦游四川以廉潔得保六品銜受勅封族黨皆稱母教所致凡守節四十七年

吳氏錢國琮妻國琮祖遵道明諸生爲襄王世子傅以學行起家吳年十七歸國琮生子正前正昆正元佐夫侍奉堂上養生送死曲盡孝思克守高曾矩矱國琮歿矢志撫諸孤次第成立治家勤苦家中落而復興卒年八十四孫臨川有文譽請於學使洪表其閭曰幽節宜彰

金氏諸生錢羽彤妻笄年歸羽彤未幾寡撫孤之錦成立娶婦張氏而之錦歿遺孫世榮甫三歲婦承姑志鞠育藐孤兩世嫠居相依爲命聞者惻然學使戴旌之曰松筠並壽

錢姑志大之女志大早歿遺貞女與兄維昌維昌年十三爲匪人所誘流離他鄉貞女既長矢志不嫁勤紡績薄置田產後聞維昌爲王姓義子已婚娶有子二乃尋兄索其次子歸承祧焉

李氏監生方引年妻夫亡無子撫姪爲嗣年八十餘卒又榮年妻呂氏夫亡年甫十八家人意其少諷之改適誓死靡他立姪爲嗣事舅姑孝敬有加年九十餘而終馬氏方立行妻歸立行三載生子甫數月夫亡守義教子具有法度後其子克自樹立猶戒敕不怠鄉黨稱以爲賢守節踰三十年而終

石氏方永祚妻夫亡有欲奪其志者毀面涅墨自誓守節歷四十五年

王氏裴以政妻廩膳生心泰之姊也歸以政生子一女三旋殤無何夫歿立嗣爲後時舅年六十餘患風疾臥床九載婦奉羹藥久而不怠後嗣子復歿撫育嗣孫備嘗艱苦守節歷三十七年

陳氏裴必福妻夫亡無子躬勤約以撫嗣子事舅姑稱孝鄰里敬之又必登妻張氏夫亡撫孤子以南勤劬倍至守節歷三十餘年

韓氏裴大麟妻大麟歿遺一子旋殤無何大麟弟大善復相繼卒妻李氏有子女各一姊妹同志守義共撫一子承兩祿守節均歷四十餘年

陳氏冀州人參將解明貴之母年十七歸明貴父志忠志忠旋從其舅出鎮山海關陷於軍傳以爲死矣陳泣曰夫無嗣幸遺腹男也解宗庶不墜已而果生明貴繼姑性悍戾故窘陳衣食屢欲奪其志陳別一目以免明貴後以滅賊功累官黃州游擊調溫州擢湖南撫標中軍參將順治中封陳太淑人卒年七十有六明貴乞假歸郢葬之東郊

曾氏諸生解聯魁妻夫亡子毓秀甫再週誓死以殉姑勉諭撫孤爲重再三乃止家徒壁立晝夜紡績躬自訓子十餘歲猶不令出戶毓秀補廩膳生

王氏舉人解澤沛之妾歸五年而澤沛卒王無出依嫡子以守衣履垢蔽不易值家計日蹙半菽莫飽鄰嫗誘其改適乃截髮自誓守節二十七年終

歐陽氏孔應藩妻自幼端重歸應藩數歲而寡一子尙在襁褓矢志撫孤念夫讀書未成珍藏遺籍以貽其子閉戶蔬食鄰居惟聞機杼聲雖三尺童子不得見其面也

王氏孔傳薪妻歸傳薪七年而寡一子相繼歿未幾所立嗣子復歿乃立姪孫承重以長以教備極勤劬孤苦零丁而志不少挫守節歷三十三年

李氏孔憲魁妻同治元年賊至與夫妹俱投宅旁水堰死

劉氏年十八歸孔廣禮生子昭宣甫五歲廣禮亡時舅繼楨姑陳均在堂劉仰事俯畜歷嘗百艱及舅姑相繼逝世乃命昭宣兼習木工昭宣術日精傳徒日廣每月朔召生徒研究并定規約羣遵守之鄉人皆以爲得力於母教也劉卒年八十四守節歷六十年

劉氏孔錫齡曾祖母年九十三又錫齡母郭氏年八十二

吳氏田士宏妻歸士宏踰歲生子詔尙未彌月士宏卒吳哀毀殆無生意服闋姑婉詞試其意吳曰姑憐婦欲遣嫁耶婦惟有一死耳然如此三歲孤何於是姑不復言紡績自資撫詔尙成守節歷四十餘年

張氏田遐昌妻于歸二載生子錦甫八月夫亡舅姑絕悲痛張更抑哀思多方譬曉

抱孤子於前以慰解其意卒撫錦成立舅姑倚婦如子嘉其孝而安之守節三十年終

張氏田某妻夫亡苦節數十年

曹氏田俊元妻諸生祖烈之母也現年九十餘歲

江氏田和亭母年八十四

杜氏丁時尙妻時尙病危祈天願以身代久之竟不起痛欲殉顧念子女在抱宗祀所繫忍死教育迄於成立姑失明倚爲視聽者數十年姪某幼失恃鞠之如己出及壯無子命子伊以仲孫承大宗暮年家頗豐裕而紡績不輟或勸之曰吾雖老性不能逸也年九十餘卒又懿德妻孟氏夫亡守節七十年年九十一亦以上壽

終

傅氏丁克寬之母現年八十五

李氏丁維英妻夫亡事姑克孝撫孤子志崇成立守節踰三十年

黃氏許克蓮妻夫亡事孀姑維謹嗣子永福授室遇寇亂死踰月其婦舉遺腹子人以爲婦宜有後云

游氏許祈信妻夫亡守節歷六十四年年九十三卒又從賢妻陳氏守節歷四十一年

楊姑許光宗聘妻過門童養尙未完婚咸豐四年土匪踞城未及避有兩匪潛入其家姑趨出後門投水死光宗繼之又烈婦李氏適許夫名未詳亦遇賊投水死

張氏許國泰妻年百歲立有碑記

袁氏侯永詩妻劉氏永江妻嚴氏永春妻均早寡娣姒三人同心守志家貧交紡互織獲貲自給學使龍旌其閭曰清節鼎峙

陳氏侯省相妻夫亡遺孤三歲孝事舅姑慈撫弱息子長連抱孫苦節五十餘年又一清妻黃氏苦節亦五十餘年

黃氏侯尙文妻年二十夫亡備棺視殮乃縊而死

柳氏舒世勳妻夫亡事舅姑竭誠致敬二子國理國聘稍長教之事祖父母以孝苦節歷五十餘年年八十卒又從子國貴妻許氏苦節五十六年年八十二亦以上壽終

蔡氏舒維邦妻歸維邦五年夫歿家貧躬紡績自給苦節三十八年又廣廷妻劉氏苦節四十九年

吳氏戴志忠妻夫歿遺腹生子興書慈翼而嚴督之訓迪有方及興書娶婦蘇氏諭年復歿蘇痛哭仆地吳婉諭令無死時祖舅姑猶存姑婦並克盡孝養歿而喪葬如禮又能躬勤約以植其家爲興書立嗣曰邦福蘇教之如其姑督興書也兩世完節鄉里欽之

藍氏戴全烈妻與全烈均百歲

張氏戴大文妻又張氏宗清妻守節均歷三十餘年

王氏戴某妻賊至投水死

蔣氏年二十歸溫洪昇洪昇歿子如瑄甫數月忍死撫孤以長以教娶婦亦姓蔣氏甫畢姻而如瑄復歿姑婦相依紡績自給皆守節歷數十年

艾氏溫繼昌妻夫亡長子曰舒次遺腹子曰明艾依十指以養舅姑撫兩孤至成立守節歷三十年又如絳妻張氏守節亦歷數十年

孫氏歐發祜妻以父母亡幼爲歐氏養媳年十六成婚越八載而寡僅遺一女乃立姪爲嗣嗣子本生父卒無餘子復取以歸孫自分當死猶覬立孫爲夫後顧卒無嗣守節四十餘年

李氏歐承智妻夫亡無子依姪以居足不踰闕煢然孤苦而秉志彌堅守節歷五十年

李氏歐作盛妻夫亡遺一子撫之成立苦節歷四十六年又廷忠妻江氏懋妻黃氏苦節均歷四十餘年

熊氏歐作楨妻年百有一歲宗族爲之樹百歲碑題曰婺煥期頤

韓氏年二十二適歐陽某數月某亡某弟立夫未成童韓視同骨肉情篤而禮愈嚴每有教誨立夫奉命惟謹既冠爲之娶婦生子大治遂立爲嗣卒年七十有六凡守節五十四年

宋氏諸生茹其章妻其章卒遺孤作梅甫四歲飲冰茹蘖矢志靡他孝養舅姑終始不怠教子循循有法卒年八十有四作梅歲貢生官臨淮縣丞乾隆四年旌表祠祀從子作棟婦吳氏亦以節著

吳氏歸作棟生二子作棟亡婦事繼姑維謹家甚窘而孝養不缺戚族周之却不受曰未亡人自食其力分也子炯煥皆遵母教能自立

向氏寧波知府邱業之側室歸業生子學崑業卒於官嫡張憐其少欲遣嫁向泣曰妾即無子義當終始况呱呱已在抱乎即悲哽欲絕嫡感其誠携歸飲食寢處必在側縫紉浣濯不待命服勤至死年七十一卒業子婦谷氏亦以節著

谷氏學密妻學密業長子以知縣候選谷年十七于歸越十年而寡谷撐持門戶

銷弭患侮家賴以完姑患瘋痺谷宵從寢處晨代櫛沐一羹一飯皆躬親跪進不以假手婢媪如此者十八年如一日教子渾讀書植品皆有程度渾康熙癸酉舉人仁壽知縣谷年七十八卒蓋節而以賢孝聞於時者也

金氏項文治妻父處士繼績潛德不耀內行肫然金幼承家訓循循禮法適文治三年而寡冰蘖自矢資紡績以自給而教子撫孤有方鄉閭憫而敬焉苦節歷三十年而寡冰蘖自矢資紡績以自給而教子撫孤有方鄉閭憫而敬焉苦節歷三十年

載

杜氏項煊妻年二十二歸煊生三子連殤其二僅存次子士富甫三歲而煊歿家素貧營營朝夕抱節撫孤備嘗艱苦奉舅姑飲膳裕如舅姑歿喪葬如禮里黨賢之又煊妻宋氏守節歷四十八年

黃氏諸生左爲模妻幼失恃依舅氏循循有規矩舅氏賢之年十九歸爲模爲模豪於飲輒婉勸之或會文夜歸躬致茗饌甚謹數年爲模卒一子甫能行涕泣撫育至於成立守節歷數十年

黃氏左煥友妻諸生如梯第四女幼嫻閨儀左亦世族及黃歸家中落食貧晏如年二十二而寡有一子艱難拮据而志不渝十餘年抱節而終

涂氏章添榮妻生子盛文三歲夫亡家貧無依以紡織度日年八十三卒

唐氏庠生章掄元之妻年二十八夫歿守節歷三十餘年學使張題額旌之

邊氏章國璠妻夫亡無子誓志守義足不出戶庭苦節歷三十年又學漣妻張氏苦節四十四年

萬氏伍紹夏妻夫亡遺腹生子世光處貧苦孤危之中卒撫其子至成立又紹中妻聶氏夫亡凡附身附棺皆竭力經營遇春秋祭祀必誠必敬守節均歷數十年

王氏伍兆富母邵氏兆啟母陳氏士魁妻楊氏兆宣妻劉氏際盛妻及兆堯女大姑賊至均投水死

胡氏候選州同江文俊妻幼通書史歸文俊二年而寡歌黃鵠以示志晨興浣手讀列女傳事舅姑盡誠撫姪行昌爲嗣訓迪有方年八十四卒

曾氏江成名妻夫亡子繼傳六歲瘍操井臼撫孤成立娶婦生孫孫稍長教以詩書
每夜誦則挑燈相對喜溢於色孫智臨補諸生守節歷五十餘年

聶氏廖士麟妻歸士麟二載夫亡子逢年未週矢志守義事舅姑稱孝逢年稍長躬
爲教督逢年補諸生能自立遵母訓也又連科妻傅氏守節四十六年

秦氏邊清元妻清元卒子廷煥女二俱幼秦持家政動止由禮內外井然撫子女次
第成立艱劬倍至守節歷數十年

何氏邊保合妻同治元年賊至邊家畝何負子女逃行里許遇賊奪其子女何罵不
絕口賊支解之殉節最慘

鍾氏賴士秀妻夫亡無子族人謀強嫁之入室自縊死

汪氏賴修甲妻又修輔妻亦汪氏均早寡守節各歷數十年

戴氏及笄歸賴可畏生子二均歿無何可畏亡時戴年甫二十二誓無他志撫從子
爲嗣性溫淑事舅姑孝處娣姒和閉戶紡織與僮僕不交一言每歸寧必命姪輩

隨行垂老不改其常今守志已三十餘年矣

劉氏費鎮妻鎮亡遺孤學江幼茹苦撫育學江爲例貢生孫蓋臣郡庠生守節歷五十年

樊氏費學海妻涂氏學淮妻均守節歷數十年

程氏齊祥麟妻夫亡家貧紡績縫紉晝夜不輟祖翁篤老祇事無違姑卒有小姑四人年皆幼撫育以至成立苦節歷三十餘年

張氏齊堂繼配生二子夫亡前妻遺一子視如己出躬勤紡織撫三子皆成立得見曾玄五世同居年八十四而終

張氏監生谷畧如妻合浦知縣景銓女也年十七歸畧如十年夫亡子源湘甫五月畧如從兄弟景如有聲庠序妻盧氏笄年于歸生子三而景如物故兩婦茹苦完真各歷數十年景如子源洙國子監生

許氏袁士迪妻夫亡無子撫嗣子永修教以植學事姑尤孝謹鄉里稱之

李氏袁爾臧妻夫亡治家嚴事無鉅細皆遵禮法撫子鳳鳴成立守節踰三十年鳳鳴國子監生

袁氏袁正新妻賊至投水死

梅氏袁保山妻現年八十一歲

李氏宗若亭妻胡氏若沂妻又若亭從子寶桓妻全氏均青年守志各歷數十年鄉人稱宗氏三節云

錢氏孟學錦妻夫亡苦節歷四十七年

王氏把總孟祥麟母咸豐初賊至自縊死又起義女年十七遇賊投水死

王氏覃緒妻舉人化樞之女弟幼慧知書及笄歸緒期年生子錦未幾緒以馬逸溺死錦隨歿王念舅姑老未敢言死泣血飲冰竭力以奉守節二十八年以終

尤氏覃周易妻攜子婦楊並幼女三人避亂遇賊均投水死

王氏覃宗江之母年九十五又宗釗之母亦姓王年九十三

張氏閔元長妻夫亡遺孤甫月餘撫之成立苦節歷三十四年

艾氏閔瑄妻夫亡無子家貧依母家居備極艱苦守節歷四十三年又應泰妻張氏
守節三十五年

柯氏把總閔德元妻年八十七歲

李氏閔登銀母現年八十四

張氏聶繼劭妻夫亡苦節五十三年年八十卒

劉氏聶世榮妻避亂城北世榮被賊掠去劉撲水死

熊氏副榜庠士墉側室嫡無子撫姪銓爲後復勸夫納熊時熊年十七未幾夫歿熊
守志不渝事嫡循禮嫡亡持家勤約同治元年舉家避亂山中遇賊孫婦樊氏孫
氏恐被污投水死孫文澍文渤被掠婦求釋弗允哀懇之賊怒斷其左耳而去苦

節歷五十五年

傅氏庠文涵妻夫亡遺女一撫姪德榜爲嗣守節四十餘年

劉氏蘇文瑞妻夫亡遺孤二家貧劉日貧何傷貧然後見節義晝磨豆爲粥夜機聲唧唧奉養賴以無缺撫二子成立年八十卒

彭氏蘇善全妻夫亡孝事舅姑撫孤成立守節歷三十餘年

黃氏蘇毓乾妻年二十二賊至抱週歲女投水死

劉氏龍源清妻歸源清六載而寡事舅姑以孝聞守節歷五十餘年又源愷妻周氏撫姪爲嗣每家祭必嚴肅拜獻教子至成人守節歷三十四年

龍姑國爽女賊至自縊死

陸氏耿世賢妻夫亡無子撫姪學遷爲嗣教養備至苦節歷五十三年

周氏耿學懋妻夫亡無子堅志守節爲夫立後克勤教壽年四十七卒

李氏寇希祚妻夫亡子廷詔三歲廷奉甫晬勵志守節事舅姑盡孝教子有方年七

十二終

童氏寇士柏妻夫亡遺孤成均甫二歲一女四歲勤紡績以奉舅姑撫子女成立歷

六十餘年年近九十卒

劉氏閩聖祚妻聖祚歿躬紡績以養舅姑斤斤持禮法守節三十九年卒

王氏閩宏略妻夫亡苦節歷五十餘年又大禮妻周氏尚儒妻范氏守節均歷數十

年

魏氏歸閩某生子二女一而寡家中落度日維艱魏以隻身經營小貿撫子女成立
長繼堯次繼舜皆能以商名家守節歷數十年鄉里稱之

石三姑父正一姑字夏琳于歸有期而琳歿聞訃往弔偵夏宗無可承嗣者葬後即
還母家持服守節或謂正一盍爲之更謀有家三姑聞之不食數日自縊死

宋氏夏國相妻夫亡子幼誓志不移舅性剛能曲意承順族黨稱其孝撫孤成立守
節歷數十年

黃氏夏大邦妻年二十四而寡遺女二現年七十三歲守節已歷五十三年

張氏夏國璋母年九十二劉氏夏純煒妻年八十一

高氏葛齋太妻數歲生子崇階齋太亡矢志撫孤苦節五十餘年而終

李氏葛學渭妻麻城司訓本榮之妹歸學渭三年夫歿無子立嗣撫之苦節三十年卒

戈氏時士璞妻士璞歿有子三歲清潔自守躬勤苦以育其孤戈雖農家女而動有法度苦節歷三十五年

劉氏時德昭妻李氏時之屏妻守節均歷數十年

崔氏洪希聖妻笄年夫亡有遺腹子亦歿或欲奪其志乃自經死

楊氏洪秀楊妻夫亡其兄以夫家貧窶陰議再適有成言矣楊聞之持刃自剄遇救不死兄乃不敢言與孀姑相依一室歲荒絕食處之晏然守節踰三十年

張氏文健妻健亡一子運辰復病瘡張指物教字指數學算孤後識書知算且循循有禮田宅亦有增於舊鄉黨稱之守節歷四十三年

劉氏文鵬妻夫亡守節五十七年年八十五卒

羅氏文詔安妻年十六于歸十八夫故苦志守節現年六十歲

田氏甯曰類妻守節六十六年年八十七卒又貢生曰俊妻阮氏亦早寡守節二十七年卒

韋氏施運達妻夫亡矢志靡他艱難撫孤事舅姑曲盡婦道父韋翁無子婦迎養於家爲娶庶母生子鍾秀飲食教誨與己子無異孤子開鼎讀書自立鄉黨稱之守節三十五年

張氏施文蔚妻夫亡無子以姪爲嗣年七十二卒道光二十二年入祀節孝祠

李氏施開來妻歸開來二年夫亡遺腹生子守節歷三十二載

劉氏華晉三妻夫亡姑老子幼仰事俯畜皆能盡道守節歷四十六年

陳氏華盛妻夫亡守節歷三十六年

邱氏華某妻同治三年賊至投水死

馬氏臺能祥妻歸未踰歲夫亡苦節五十一年

劉氏臺文瑾妻夫亡事舅姑孝教子以義方年八十一卒

顧氏尹興崇妻夫亡撫孤成立五世同堂年踰九十卒

潘氏尹靜軒妻佐靜軒以勤儉起家現年八十猶躬操井臼族黨皆奉爲母範云

李氏尹傳珍妻歸傳珍七月而寡苦節歷三十年

鄭氏尹國標妻歸國標二年而寡守節五十餘年

萬氏辛貢九妻苦節歷四十餘年辛世祿妻陳氏生子榮昶而夫亡守節四十餘年

高氏成漳妻蔣氏成元鐸妻守節均三十餘年

亢氏魯紹伊妻夫亡無子立姪爲嗣娶婦生孫嗣又歿率嗣婦撫孫恩勤倍至苦節

歷三十二年

陳氏諸生魯相妻夫亡撫子崇烈慈嚴兼盡崇烈補諸生能紹父業苦節歷三十年

劉氏魯品玉妻年八十三

傅氏姚正國妻夫亡無子立姪爲嗣守節四十餘年又儒士塘妻李氏守節歷數十

年

田氏姚德先妻夫亡遺子二撫之寓慈於巖均能有成年六十五卒

韓氏姚璜妻年二十四璜歿守節四十餘年

劉氏姚明陔妻幼失怙受寡母吳氏教明大義不苟言笑民國二十一年適歸寧遇匪掠去置馬上劉慮受辱行經堰旁躍水中而死

劉氏柯純妻笄年適純生子若曾純歿孝養舅姑教督孤子備歷艱辛子長以孝聞康熙二十年已有舉其節孝於當事者一時士大夫播諸歌詠皆稱節母之有子然以若曾充縣掾忌者陰撓之致未上聞雍正四年闔邑士民復具其事於知縣陸某注冊題坊

王氏敖啟輝妻夫亡三子俱幼苦節自誓事舅姑以孝聞撫教諸孤心力俱瘁康熙丙戌新菴隄潰給族貧者粟獲免流亡他境流民經過者輒施以壺殮人咸德之年八十餘卒季子鏐諸生

包氏季次貞妻夫亡遺孤三歲先是其家貧甚倚次貞館穀爲生計次貞既卒殆不能自存包竭力營葬其夫乃晝拾遺秉夕勤針工積斗粟百錢持以爲紡織資舅姑有以爲養孤兒亦得存活皆包力也苦節歷三十九年鄰里聞諸縣令注冊題坊

陳氏黨大恒妻貢生傳韶之女諸生鴻賓之妹也年二十三而寡備極哀毀欲以身殉方娠未果月餘生子遂立志撫孤黨氏析箸田產器具強者據之月給脫粟數升終日不飽嚴冬衣無著絮肌髮槁蔽見者流涕而冰操凜然孤子甫成年近四旬而歿

楊氏嚴麻橋人年十八歸同里嚴元和十九而寡撫從子道三爲嗣道三甫四十而歿越三月婦張遺腹生子貫一又十年張歿貫一復失恃楊持貫一泣曰吾撫汝父襁褓中備極艱辛今又撫汝願汝異日之能自立也貫一現服務鄉邦楊年八十有四強健如恒人以爲苦節之報云

吳氏嚴自莊妻少有至性歸自莊事舅姑竭誠致敬以孝聞姑魏病危醫藥罔效禱神願以身代疾未有瘳吳情迫取刀割臂肉血淋漓和藥以進明日姑愈事聞郡守吳肇榮邑令焦毓鼎造廬獎之榜曰孝婦

史孝英父道恒艱子息中年生子永泉甫四歲道恒夫婦相繼歿內鮮伯叔外逼強鄰孝英誓不嫁撫弟成立鄉里稱之

黃氏貢生關榕妻榕才而貧居城內宅後有隙地畝餘黃闢而菽蔬菜以時灌溉出所餘易米鹽供朝夕榕以是無內顧憂益肆力於學有聞於時初咸豐四年賊逼縣城急家人避之四方黃時屆分娩榕與黃兄不忍離黃速之去出長子與其兄曰此四齡子賴舅負以逃事急與若父分竄或可幸免也甫行而城陷黃負嬰間道匿城東叢林中者十日賊退家人始求得之方在叢林時同匿某婦勸黃棄嬰謂賊踪跡至一身且不可保烏庸此呱呱者貽累黃泣謝曰吾夫與四齡子存亡未可必吾忍死匿此者正以此嬰棄嬰而吾何以生爲某婦遂不敢復言嬰長名

兆福卒以詩書世榕之傳同治中有遇賊而投水死者爲黃從女曰關大姑

關大姑年十四縣學生關樑女母張氏同治元年賊至大姑扶母與伯母章氏伏叢棘中越日疑賊退隨章氏出望將至澗邊見數賊奔至章氏急投水大姑從之未幾賊去鄰婦救章氏起移時甦曰大姑無恙乎救之已無及矣

唐氏關慶遠妻年十九而亡關家世儒素慶遠習舉子業未成而卒家徒壁立唐恃針黹度日苦節歷四十餘年卒之日謂有人以輿來迎殆亦節義所感召云娣姒中又有王氏者爲慶永妻慶永歿時壬年二十七無伯叔無子女亦以針黹爲生現年六十歲苦節三十餘年矣

李氏黎正虎妻年十五歸正虎生女一正虎歿李誓而貧以推算星命爲生與何鵬妻劉氏互相授受劉亦早寡矢志無他婦守節歷三十五年

呂氏焦鎧妻笄年適鎧五載生一子甫週而夫亡家故貧勤紡織以奉舅姑撫孤子訖能有成諸孫林立守節五十餘年卒

劉氏焦長春祖母現年八十七

常氏崔金國妻笄年歸金國數載夫亡有子二勵志撫孤所居不蔽風雨旦夕別草根而食終無渝志守節及三十年

曹氏武瑛妻歸瑛五年而寡子宗周宗聖曹事堂上以孝鞠膝下以慈兩子訖皆成立守節歷三十八年

李氏葉逢春繼妻夫亡事舅姑孝前妻子一撫之逾已出苦節歷三十六年學使題額旌之

鄭氏葉先舉祖母年八十一

姚氏譚治經妻夫亡苦節四十餘年子星南候選縣丞

謝氏國學生顧承棠妻歸承棠生子大旭三歲夫歿上奉舅姑下撫孤子苦節二十五年卒

王氏顧大偉妻年二十四夫亡無子立姪道直撫之娶婦生孫苦節歷五十年

王氏監生易德慶妻夫歿守志性慈好施予遇歲荒人多被其德苦節歷三十餘年
王氏翟鳳翹妻夫故誓死靡他撫姪爲嗣綜理家政內外肅然里黨稱之年六十餘
卒

高氏涿州知州登先之孫女年十八歸諸生郝鸞十年而寡二子一女俱幼高上奉
舅姑下撫弱息動有禮法鄰里欽之守節三十餘年終

石氏亢永福妻年十七永福亡垢面灰心誓不二養舅姑必親治膳雖有婢媪不使
代暇則鍵戶縫紉而已守節歷四十三年

李氏亢大成妻年二十三而寡家奇貧舅姑先逝又無子女子然一身毫無依賴勵
志守節惟以針黹度日今年已八十矣

徐氏虞大智妻夫歿無子家貧甚守節歷四十五年依弟士熙以終
吳氏古應楷妻事舅姑以孝聞夫亡苦節歷三十五年

孫氏國學生上官承玉妻夫亡守節五十年卒

李氏管昆妻夫亡守節四十年

張氏姜正俊妻夫亡守節歷四十餘年

鄧氏毛承麻妻夫亡守節歷三十餘年

鄧氏諸生毛忠臣妻九十二年

劉氏安天爵妻夫亡守節歷數十年

傅氏湯某妻賊至投水死

程氏湯家新之母現年八十

周氏諸生度南江妻夫亡苦節歷四十餘年

熊氏越曰爵妻夫亡苦節歷三十餘年

解氏車呈祥妻咸豐四年賊至投堰死

陳氏豐巒妻夫亡苦節歷三十七年

蔣氏湛學寶妻同治三年遇賊大罵不屈死

帥菊姑玉友女年十五賊至被殺數傷仍乘間投水死

何氏栗開泰妻遇賊投水死

林么姑石牌人父壽山經商年十七待字閨中民國丁卯夏赤匪李某陷踞石牌聞女美率隊至其家搜之先是女母聞匪將至送女匿戚家匪以索女不得執其母酷施榜掠哀聲動四鄰女聞將奔救戚勸之曰賊索汝不得將釋母往必無幸女曰安有聞母難而不救者乎馳往謂賊曰釋吾母則從汝否則有死而已賊信而釋母女私囑母速遁度母去遠起罵賊曰汝曹釜底游魂乃欲污我耶賊誘以利不從脅以威罵益厲身被鞭箠幾無完膚終不屈賊憤而槍殺之當是時赤禍橫流女子以開通自命者方高唱打倒貞孝之說不知羞恥爲何物林女獨挺身救母罵賊以死豈非天地正氣之所鍾哉

林姑林愛女年十五咸豐四年與鮑胡氏李林氏避亂石牌市西匿高宅賊至與鮑胡氏同遇害李林氏投水死

程氏尙誥妻賊至誥被殺婦投水死

胡氏筮永海妻夫亡守節歷三十五年

楊氏白廷玉妻夫亡守節歷三十六年

田氏呂啟科妻夫亡守節歷三十四年

曾氏呂輝瀛妻年二十四夫亡子二女一婦矢志靡他守節歷三十餘年卒能大起其家邑人程洛爲之立傳

楊氏賈之傑妻夫亡守節歷四十三年

楊氏諸生賈明恩之繼室年二十五于歸越四年生子二而明恩卒前室遺子女各一家貧楊以十指佐生活待前室子女如己出以養以教婚嫁各得其所年五十餘卒苦節歷二十餘年

黃氏辛可富妻夫亡守節歷數十年

陳氏喬應德妻年九十七歲

鄭氏祝慶生妻年二十一夫故子安定甫晬鄭以撫孤爲志安定稍長即命就塾讀書嗣以力薄不能升學命改習醫安定醫術日精鄉人皆歸功於母教焉卒年七十四

劉氏庠生超英女適鄔健聖鄔氏世居城南龍家集道光中屢遭水患家中落健聖館甥室三年始成婚生子三而健聖歿時劉年二十九撫孤成立長紹勛亦娶劉氏即母族姪也紹勛避髮匪之亂以痘沒於河北遺孤一越五歲殤以從子廷蘇爲嗣廷蘇父蘭芳恩貢生爲節母第三子廷蘇復蜚聲庠序以詩書繼其家鄉人以爲兩世苦節之報母年七十一婦六十三苦節均歷數十年

王氏阮善臣妻年八十二劉氏阮廷吉母現年八十

楊氏年十八歸重之盤生子二而寡時楊年二十七家貧賃屋居爲富室澣濯縫紉以撫其孤守節五十餘年

楊氏任喜妻現年八十一

李氏縫工康壽母現年八十六

論曰易大傳曰乾道成男坤道成女此男女之定於天者也家人之卦曰女正位乎內男正位乎外此男女之定於人者也古者內言不出於梱外言不入於梱其限制不無過嚴然女子一生由女而婦而母雖所遭有幸有不幸而必以門內爲職則固理之無可易者就其幸者而論壽母令妻形管有燁不幸亦徹瑱磨箠日誓志於以明節概播徽音正人倫美風化其所係豈不重哉海通以還歐化東漸自由平等之說首中於男女爲女子者往往不復以門內爲事其有才有學與夫美術文藝足以名家者視古昔容有過之然而貞孝節烈之風微矣嗟呼運會日新世風迥異前顧茫茫靡知所屆而是篇獨述往事守陳說後之覽斯傳者其將責以戾俗違時抑掩卷而致太息否或望古遙集猶幸此編之可以考其梗概皆非編者所及料也

鍾祥縣志卷之二十八

前志概略

縣有專志自清康熙五年始繼是兩修於乾隆一修於同治一縣掌故固已燦然大備矣其宋明各志曰郢州圖經曰富水曰增修富水曰安陸州曰承天府雖不盡闡吾縣然縣以附郭邑所載常十居五六曰興都曰承天大志皆紀明興藩及世宗龍飛事惟縣爲世宗發祥地凡宮殿陵寢之制建置改易之規與夫入繼南狩升祔祭告諸典禮綸綍所頒勒諸金石至興邸勤宣教化示惠邦人以及流連景物諸詩文皆吾縣文獻攸關尙論者所不可或忽茲依時代先後次第著錄俾得攷其概略云

郢州圖經宋淳熙六年郢州太守韓泳纂述書佚

富水志宋淳熙十三年郢州太守張孝曾主修州學直學郝允若學錄晁子濤編次

峽州鄉貢進士張昌基考究襄陽府觀察推官任澆校定錄事參軍宋宗堯推官

朱琢監造州學教授張聲道校對凡十卷三十四門書佚今可考者有張聲道序

序云古者封建諸侯天下為列國至秦始郡縣之晉宋以來錯置州郡唐與蔡汝
 州名鄧之為鄧楚郊鄧之舊也東走江淮西通梁漢南徑荆襄北則馳騁乎陳蔡汝
 穎之郊雖號為四通八達之地而有石城以為固漢水以為限昔人因形便以置州
 本事始以取名蓋得之矣楚始都鄧今江陵是也後遷鄧於壽春而魏文帝亦嘗以
 荆之江北諸郡為鄧州然壽春之鄧終於復故南郡之鄧旋即正名鄧之名雖四而
 實一耳惟劉宋以後一彼一此互列為州名有東西南北之殊地有江夏義陽淮安
 定城赤石安廣之異道德不一文軌不同三乾元州名始定迄今言鄧事者乖戾錯
 雜認鄧渚者十八九指江陵者半之而於義陽淮安汝蔡光隨亦略取其二三也祖
 襲謬說綿歷久遠不知者類以為真而不知者曰春秋傳疑之義固當爾耳信如所云
 則古人辨國正封之意果安在哉鄧舊有志其先出於錦絕淳熙丙午張侯實來見
 其疏略舛誤舛焉甚不滿也己而興什植僵條具貫整暇乃命衆俊輯成此書凡為
 卷分三十四門細大畢載頗末具舉以分星所臨各有封域而徐雍荆邑郊鄙不宜
 故辨鄧州以坎險之象天造地設而依山為固彼此弗類故辨石城都鄙不互見
 混並也故辨二鄧分疆對境安可錯雜也故辨章山名跡事實必有定所也故辨新
 市于是名正言順綱舉目隨千載訛謬一洗空之侯于是州也日夜究心恢張形模
 革易徹陋將去之日如始至而是書之成蓋可以
 見其綱目聲道敬歎之餘敢叙所以冠于篇首云

增修富水志明洪武十一年曹國公李文忠主修州學訓導熊斌黃汝舟增輯書佚

安陸州志明正德十二年致仕戶部尚書縣人孫交纂修凡二十卷以十六卷載州

事餘四卷載屬縣京山事書佚今可考者有孫交自序

序云郡邑志何始乎始于古也古始于何時乎始于

九邱也後世謂九邱九州之志也漢孔安國曰邱聚也土地所生風氣所宜皆聚於此書也後世地志圖經其皆權輿於此乎交幼學時見郡志稿紙不百幅繼見一統志為天下志當略又見湖廣通志為一省志猶略後得富水志修于宋淳熙間元與本朝之事未暇歸林下日以筆墨自娛次第舊稿為一十六卷郡有衛事以乘顯先職事未暇歸林下日以筆墨自娛次第舊稿為一十六卷郡有衛事以類附屬邑京山別為四卷名曰安陸州志凡例遵一統志與纂修條目率不外乎土地之所生風氣之所宜焉今憲長公承之前按荆襄既修襄志使節過鄂時尤切注意屬郡守王君下車留心政教欲攷郡志以爲因革之宜知交嘗纂錄也索稿至再始出與章山提學沈君商訂王君校正二君之勞實多將刻梓王謂交曰茲猶一郡之史也請序諸篇端交聞古者列國皆有史官掌記時事今車書一統惟國有史郡邑無史謂之志者紀事之書非史也他日修史者有取于是焉耳若效史體一字一言抑揚褒貶悉有書法是以志爲史也惟關於土地風氣者巨細不遺美惡並載聊以備觀風者之採擇耳交草創也鄂之後賢必有能討論修飾而潤色者庸書此以俟

興都志明嘉靖二十年詔工部尙書顧璘主修璘奏聘京山王格應山顏木黃岡王廷陳分充纂修官書成不稱旨未予付刊近從東方文化圖書館獲睹進呈底本所列職名纂修除二王及顏外有湖廣布政使司右參議方遠宜魏良輔按察司僉事柯喬三人建議纂修并專理采集者爲承天府知府吳惺膽錄則荆門學正張冕安鄉教諭許蟠盧溪教諭官德章校對則潛江教諭歐陽國光承天訓導汪

珍采集則錦衣衛右都督陳寅都督僉事張錡都指揮僉事趙俊指揮使陸炳指
揮僉事劉鯨張爵及禮部聽考儒士王顥也計全書二十四卷分典制郡邑二綱
典制統二十一目專紀分藩及踐祚後諸大事郡邑統九目分屬三十六條則地
方一切掌故也當時以不稱旨未予刊行雖以事關帝室不應分紀郡邑事宜然
就今日而論自宋明諸志散佚盡淨每苦文獻無徵而斯志於富水安陸兩志尙

多錄其原文可以糾正有清諸志之訛而補其遺漏者甚多是誠希世之珍也

麟顧

進呈表云伏以王業有基在大道篤於求舊天恩罔極唯孝子爲能饗親豐沛粉榆
嘉湯沐之世復鼎湖松梓慨衣冠之月游爰弘聖作之謨丕顯帝都之麗運宜改物
義重隨時將燕翼以爲謀宜方策之是布竊稽古郢雅號名邦勢控荆襄利周雲夢
分茅建國春秋之世始雄列土提封唐宋以還屢改山標櫺木雄虎豹之嚴關川帶
石城隈鯨鯨之絕島險惟在德地必因人追惟容宗知天守道洪淵仁寬程純聖
恭儉敬文獻皇帝性由恭儉胄本神明宅國之中茲焉立社思文之極允矣配天漢
之戚諸王殊仰東平之樂善周德累世尤稱西伯之行仁實肇中興暨慈孝貞順仁敬
之望治宜天道以福謙率土歸心先期厭代竟違下願實肇中興暨慈孝貞順仁敬
誠一安天誕聖獻皇后倪妹定祥儷皇誕聖易稱柔順詩贊肅謹蚤端南國之儀晚
享東朝之養純嘏宜篤徽音忽違茲蓋伏遇皇帝陛下慶鍾元吉聖集大成繼統在
躬正位恭已五百年應期而出得一以貞二十載臨御以來吹萬咸悅盡倫而盡制
事親如事天絕以卑臨尊之嫌追崇無上繫出潛離隱之重明發不忘賁郡邑以嘉

名益封疆於近壤增崇帝里雉美神京近終慈馭之上賓遠痛嚴寢之永奠禮沿輯
瑞展肆錫以省方戀切遺弓協昆占而卜宅視周純德慮重尊安詢謀僉同附議遂
定顧百司之備飭惟二人焉有懷大隧敢於玄堂龍游邈矣舊邸煥為黃屋虎變炳
然鍾石倏以易晉土木俄而改色尊之至養之至不以天子漢考原廟法良先王園
不以至貴忘其舊凡茲奕奕悉本蒸蒸魯頌闕宮事非天子况推餘愛以比懿親爰
縣奉以遷民朔望向而作伎此皆於義未協今乃得禮之中况推餘愛以比懿親爰
舉斯心而加百姓孝能永錫仁不遐遺帝庸作歌一含宮而咀徵皇建有極惓惓
是訓以敷言解慍阜財虞風披拂獨肆皆湯雨沾濡神罔怨恫默致相成之效物
皆鼓舞深諸望幸之私旋軫僅於泮辰休軌超乎歷代式昭曠烈必福大書頌以守
臣之章遂是禮官之請俾從赤縣用輯青編臣等學本面墻官非載筆探籍紳耆舊
之議咨衡閭長老所傳鳳藻龍章發此藏書之穴金聲玉振求諸張樂之備著天命人
年紀原託始典制首列事統於尊郡邑繼陳澤究於下極禮樂文章之備著天命人
心之歸封山導流秩高深之奠位建官定制小大以朝宗豈曰盛漢官之威儀實
將紹周禮之制作簡牘釐為廿帙軼翰歷於三時道器發揮多所論實多所謬圖書
表裏不盡意且一斑于管尚賴成能之聖棄短取長庶幾錄實之書信今傳後伏願衆
白之裘竟見一斑于管尚賴成能之聖棄短取長庶幾錄實之書信今傳後伏願衆
思立愛秦度包荒尊祖敬宗惟馨薦於九廟篤近舉
遠大賚及於萬方垂典則以無疆固岡陵於有永

承天大志四十卷明嘉靖四十二年詔大學士徐階禮部尚書李春芳充總裁翰林

院侍讀張居正充副總裁侍講林煥修撰諸大綬編修孫鋌充纂修凡例八條取

漢書帝紀之義分十二紀曰基命曰符瑞曰龍飛曰聖孝曰大狩曰宮殿曰陵寢

日寶謨曰御製曰恩澤曰禮樂曰苑田先是嘉靖二十年詔顧璘修興都志書成以不稱旨未予刊行由禮部轉行承天府重纂迄未報是年禮科給事中丘岳題請重修經禮部擬定條例始成是書查興都志於典制外兼叙郡縣事世宗視爲條例不合是書頗懲前失凡所紀錄以承天爲限而承天一切屬於地方者一概削去既非史體又與志殊此是書之特點也傳本久稀茲從故宮博物院抄出亦

吾縣可珍之品也

張居正表云伏以王業始基而宏一統不昭長發之祥聖人受命而撫萬方茂應中興之運動華協德諒烈重光爰哀集以成

書用垂貽而作範竊惟帝圖肇啟固錫祥之自天王氣獨鍾必毓靈之有地黃帝本軒邱而立號神農由姜水以宅尊姬籙將昌澤豫培於豐芒漢基旣建念仍注於粉榆振古如茲于今爲盛惟承天之封域實南土之隕區禹別荊州躡鶉火而幅員斯廣熊開楚甸標楸木而疆守維雄川嶽出精貞元邁會我容宗露皇帝聖修玉度邁至德於周文孝獻皇后內治母儀嗣徽音于太妃封之赤社王此大邦式國型家根本布二南之化積高累厚謳歌係四海之心乃基駿命以維新聿肇鴻修之有俶恭維皇帝陛下慶承燕翼期應龍飛握溫洛之貞符嗣膺寶歷協天潢之吉兆入御璠樞湖億佑啟之洪恩特舉尊崇之曠典甄耿光而揚大烈丕振先猷建皇極以叙彝倫遜追來孝迨慈宮之南禘勤御蹕以躬臨卜吉壤於純山廓新規於舊邸帝暉下燭騰周歌夏諺之歎天藻昭回軼過沛橫汾之詠聖澤溢江而洽漢皇風動邇以及遐至若禮文祭器之掌在祀官及夫靈圃甫田之貽諸世守闕謨偉蹟皆古昔之稀聞大賚隆施蓋臣民之殊遇匪表章於今日曷炳耀于將來顧守臣纂述之初雖塵

御覽而紀事體裁之謬未嘗淵衷豈謂無徵實將有待屬以昊恩申佑降瑞潤於山陵緬惟世德彌昭切孝思于帖肥遂願煥號俾闡賁文高館宏開簡儒臣而載筆嘉名煥錫勞宸翰以標題惟志之為稱其義本屬于郡國而此書所載用討論志在朝廷既不容盡同左右史之文又安可仍襲方與家之體乃加芟定載用討論志在尊君分十二紀以識其大言皆摭實列四十卷以總其凡父作之子述之聖而繼聖盡美也盡善也書不一書藏名山而副在有司垂百代不刊之典遠先王而監于成憲慰九重罔極之懷顯臣等學本面牆見同窺管繪乾坤之高大曷能擬諸形容瞻日月之光華何以加其潤色謹效編摩之職莫殫揚厲之忱伏願治普文明化成孝理神祇篤祐三都鞏磐石之安宗社綏休竟載衍皇圖之慶按嘉慶省志云承天大志十紀曰龍飛曰基命曰聖孝曰大狩曰寶謨曰御製曰陵寢曰宮殿曰禮樂曰苑田與張居正言十二紀者不合傳是樓書目有李春芳承天大志四十卷似即此志云云不知李張同充正副總裁別無異本十紀之說殆未親原書也

承天府志二十卷明萬曆二十九年知府孫文龍以承天大誌體有獨尊未遑他及

乃採綴成編首二卷志龍飛大略餘十八卷悉如各府志之例書佚今可考者有

孫文龍及李維楨序

孫序云當肅皇帝之二十一年歲在壬寅越於今六十年矣時少司空東橋顧公以督大工至而守郡則餘姚吳愷念承

天改州為郡參於兩畿與順天應天事相同而名相埒也是不可無志請於上得命旨命少司空兼總裁而郡守附之開局延賢旁搜遠採彌月彌年纂修與都一志進覽上謂體裁非是僅僅報聞猶騷然嘉諸臣勤勞各進一階也三十年後而承天大志成蓋經始於華亭徐少師而以肅皇帝睿思獨裁之煌煌乎偉觀矣顧事所獨重體有獨尊未遑他及無論往昔巨麗湮沒靡所考見即當時之殊猷絕續名士鉅卿與風土物情有能舍里中人而得其梗概者乎總志則略而未詳邑乘則漫而無統

凡臨茲土者不無闕疑之嘆彼其六十年間豈無博學宏識如公孫僑胥臣輩可續
 吳志者而遜讓未遑毋亦官先其事殫精於簿書徵發采綴斯難竟成闕典龍濫至
 鄧都幾二年所委蛇之下尸曠為漸景高良則勤仰止之思登覽則感今曩之致
 瞻物理則興隆替之懷而又重以二宗偉績官司叢維未易着手於是竭思盡慮至
 忘寢食羅之故實採之見在摭如各府志例即不敢妄意竊取補朝廷之闕文亦庶
 宗大略崇重典也餘十八卷悉如各府志例即不敢妄意竊取補朝廷之闕文亦庶
 幾有志筆削告吳君成事矣願其中缺遺緜謬敢謂盡無要以缺掌之吏當筆扎之
 司賞既歎於三長志復分於兩營其不能事廣文核詞訓義炳固其所也惟是援昔
 證茲各有攸宜即或藉為風勵而豪傑之士無感亦與在自委云爾故志成而察土
 觀風省方設教或可藉為風勵而豪傑之士無感亦與在自委云爾故志成而察土
 莫善於孔子之春秋魯史遺吳君文王與列國事咸在而後世推其意曰尊周其
 次司馬遷班固為史記漢書先帝紀有表志世家列傳係之未聞漢廷有異議也本
 朝列聖實錄臣民率得附見要之義有獨尊事無偏廢可矣于是傲龍門蘭台二書
 為志卷二十目四十以圖經冠其首有二祖封國踐祚以來諸行事關郡境者目之
 曰龍飛紀其體若史帝紀不與郡邑志同也餘曰沿革曰星野曰攷古曰疆域
 曰山川曰城郭曰形勝曰廟學曰典祀曰公署曰鄉市曰風俗曰民數曰田賦曰衛
 役曰方產曰倉儲曰兵防曰郵傳曰津梁曰隄防曰鄉市曰風俗曰民數曰田賦曰衛
 人物曰藝文曰寺觀曰儒釋曰高士曰貞孝曰儒馬曰方伎曰古蹟曰勝
 概曰祥異曰古墓曰雜志其體若志表世家列傳不得與郡邑志異也

鍾祥縣志清康熙五年知縣程起鵬主修府學教授皮浚明同修其分修者則縣人

賀運清鄭茂泰李本固王家柱黃秉坤李馥先高登先高承淑諸先生書凡十卷

其爲綱曰方輿曰建置曰典禮曰賦役曰官師曰選舉曰人物曰藝文首以圖考
而以雜志殿之每綱數目各以類附凡例十八條序自荆西道以下凡官縣治者

人各一篇茲節錄程序及賀鄭兩序以著是志之梗概云

程序略云上臺有纂修之令乃得諮諏於郢之鄉先

生暨學博諸士敦請名賢考搜故牒始事于丙午之仲春訖孟秋而告成焉分卷十
綱十目七十二視舊志稍爲加益或述新規或沿往制遺者補之缺者增之寧數無

又賀運濤序云天下郡邑皆得有專志紀載其事實彙而登諸國書以躋一代光隆
浮寧嚴無濫細大不捐利害備舉庶幾一展卷而燦然其明備井井乎其有條矣

美之治惟鍾則舊未有也鍾有專志蓋自今始語曰莫爲之前雖善弗揚莫爲之後雖
馬曠之矣乃土宜風俗之俱辨人物吏治之攸存則總侍此尺一之書以傳不朽甚

荒烟蔓草城池百戰者舊幾家抱文獻之思者憂乎難之惟聖天子德教覃敷車
書一統山陬海澨罔不敬應因廣修史之義下逮郡邑我侯程公適撫綏於茲自奉

憲檄卽殫心經營於焉搜討逸遺采輯見聞公聽並觀編緝成帙其一時官斯土者
如守憲馮公郡伯張公郡丞劉公司李史公皆數治仁澤淪洽爲賢良之最則

所以纂修舊聞彰新諫誠今日不容緩者越期月志成余取而讀之除闕攷外其
爲卷十首方輿次建置次禮賦役次官師次選舉次人物次藝文上下次雜志

昔也略今也詳其詳與略宜也昔也繁今也簡其簡與繁宜也典故於是乎損益興廢
于是乎關百姓之休戚于是乎咨吏治之嫩慝于是乎辨繁繼往蹟開來者損益興廢

條貫畢具所裨又鄭茂秦序云湖鄆之竟而序之以見鍾陸歷代沿革自今始且以彰程
侯之垂貽焉

鍾祥縣志卷二十八附錄

張公實來修富水志凡十卷年遠不傳教授張聲道之序詳矣明洪武中增修富水
 志正德十二年邑人司徒孫公交作安陸州志十四卷而京山四卷附之嘉靖設鍾
 祥後郡守吳公樞少司空顧公璘沒不傳鍾祥原無特志也夫志紀事之大志此志
 或時久或兵燹或未鏤行同湮沒不傳鍾祥原無特志也夫志紀事之大志此志
 存事何所稽文獻無徵鍾祥故明之湯沐邑也其載睿肅二宗諳行事頗詳類多溢
 承天府志而首附鍾祥鍾祥故明之湯沐邑也其載睿肅二宗諳行事頗詳類多溢
 美而餘概略焉未云備也自癸卯距今四十餘年其間沿革之析合蒞治之先後陵
 谷之推遷風俗人情之淳漓建置畧蹟之貞佞隱而不彰亦職方之闕也富平程公
 來尹茲土實心實政孚惠下民修廢舉墜百務釐舉念邑無專志毅然以創修為任
 軍興飛輓旁午時不暇給丙午仲春政通刀割之餘訪之耆舊徵之髦俊雖以余之
 固陋不敏亦不棄而目以類正焉相與討尋參酌凡十閱月而邑之專志成為卷十綱十
 目七十二綱舉而目以類正焉相與討尋參酌凡十閱月而邑之專志成為卷十綱十
 末畢舉續四十餘年之所未備而於前志即孫公之舊冗者刪之略者詳之闕者補
 之以成一邑全書上以俟史臣之采擇下以為將來之考鏡展卷瞭然矣而鍾祥之
 設迄今已百餘年豈無有意斯志者而缺焉弗舉前五志之成時久又廢不顯逮清
 興禮文法制靡不畢講程公究心衷輯而省志纂修有令始克成此事復經郡當事
 諸君子之裁定而義文斯備然則事固需人與時未易言也至於邑之民情醇質土
 田瘠鹵漢溢之頻年害稼隄防之禦築重困孔道要衝徭役繁苦君子觀之亦將于
 是乎有感而時宜
 補救不無厚望焉

安陸府志清康熙五年知府張崇德主修同知劉餘霖通判程湛推官史颺廷同修

其纂修者則京山王吉人景陵譚篆兩先生書凡三十六卷分紀志表傳首郡紀

終雜紀志曰象緯曰方輿曰建設曰賦役曰學校曰禋祀曰隄防曰藝文表曰封

爵曰秩官曰武秩官曰制科曰武胄曰勲封傳曰良吏曰名臣曰忠節曰文學曰

武略曰宦業曰懿行曰孝友曰貞烈曰隱逸曰高雅曰流寓曰仙釋曰方伎凡例

十七條張崇德及王譚均有序節錄如下

張序略云歲丙午奉憲修志檄適太史王樸庵先生假旋雲杜采風貢俗實

屬專圖尺簡請同握青鏤甫泱寒暑而一脫其草一玉其成間與在籍諸紳士參互

敏遂馳乃解囊付梓以告無過云云王吉人序略云孔子作春秋魯史也編年

紀月會盟征伐災異有書遷固作史記漢書首帝紀次表志世家列傳做其例係以

邑雖小其分年改遷皆與氣數攸關故象緯有志今沿地控上游挹漢而注江覽其形

勢非東吳西蜀所謂門戶咽喉相似故方輿有志列國分置名號各殊五季以還屢有

更遷然與創不同而規制大略相似故建設有志山澤之壤素稱瘠土卽稅額尙苦

莫支而水旱交困峻削日甚民何以堪故賦役有志廟學隄之役本以禦災亟築亟

潰民安所歸命乎不寒其弊貽害有不忍言者故隄防有志江漢之奇磅礪蓄積鬱
爲人文離騷九辨而後作者蔚起古人有云文章經國大業不朽盛事故藝文有志
秦漢以來分職選舉代不乏人觀其氏望及其臧否亦當世得失之林也故秩官制
科馳封有表吾郡自二南起化風醇俗美賢才應運而生其忠孝節義文章事功以
至潛德幽光苦志貞魂皆足以維衰振敝表而出之使後之君子有以感發而興起
焉故人物有列傳其他如龍藏珠函稗官叢談雖纖鉅不伴要裨益宏覽故以雜紀

終焉 譚篆序略云志原爾雅彰識方春秋以下晉乘楚書最著矣如禹貢紀郡法也周官秩官法也山海經敍山法也水經叙水法也相如與五公子相難書草木法也楊子雲九箴方言書土風法也然而法者不書則遺存者特書則諛頭白汗青昔人曾痛之豈非載筆之難哉以郡志論明嘉靖初有興都龍飛紀王太史少泉志之萬曆壬寅間李修撰大泌志之今又閱六十餘年中間興革治亂水旱兵燹之故皆完而彫昔肥而瘠昔之宮廟泮壁侈為岐邠鄴鎬之盛者而今門社城湮盡化為烟榛蔓草之餘矣使君問俗荒邱訪舊遺者予與王子適里居又幸預校正之列觀其所論述皆生齒息耗吏治淑慝與夫幽貞之操孤釐之懿籍翰之垂沉於山谷閭巷者一一可見且嚴而有體瞻而不穢博而得其要簡而周於事宜其言文而傳遠矣

鍾祥縣志乾隆三年知縣高世榮主修其纂修者則縣人李先生蓮縣學教諭鄭家

夔任采輯縣人王用汝任校輯劉國樹劉福堅周依仁任分校書凡十卷凡例十條大旨事以類記類以文貫仿紀事本末之例務令觀者一目瞭然有高世榮及

蓮自序末載王用汝跋用汝字岳夫蓮受業弟子今錄兩序於左 高士榮序略云

不漏或先叙而後議或先議而後叙或叙議兼行纓帶幹補用意多仿史漢而於國計民生愷切發摠忠孝節義唏噓慷慨俾蔚屋無不宣之情守土者可銘座右幽遐無不彰之善聞風者可以感興每書一事原委瞭然參合對勘從衡映照採摘舊聞必注明所自搜羅放失必攷証不誣且叙事中或藉揚聖朝之治化或隱寓保秦之良籌不獨專志一邑之人與物地與事已也留心當世之務者披卷將自得之

蓮自序云地以人而傳亦以人而治治一邑之地則一邑之事皆其事一邑之人皆

其人也善治邑者人和而事舉地爲之關而山川增其秀潤其德爲不朽之德其功爲不朽之功其地所以其言能紀其善則一邑之人與事皆能寫其言爲不朽之傳後世則雖有駿偉之品英烈之行與夫山川之靈秀物產之饒裕而以其庸瑣之筆寫之反覺黯然而無色令閱者昏昏欲臥譬諸丹青俗品雕塑庸工略得其似全失其真也邑志雖小胡可易言修哉朝廷久議修大清一統志部文徧行直隸各省修通志而封疆大人復檄督各郡州縣一時罔不纂修所屬之志而鍾邑高侯以續修邑志而下詢芻蕘雖辭不獲命私念史家三長未能其志亦敢邊臆重寄且舊志而舛訛因仍當時作者雖屬鉅公宿儒然多襲郡志之舛訛郡志亦襲臆重寄且舊志而舛訛因仍當時作者餘年矣又自前程侯修志以來經六十餘年中間人事推遷歲異而月不同非博訪老成考證載籍不能勒成一書用是殫心竭力搜羅遠近蓋歷三月之久乃事丹鉛而文獻不足其中缺陷不少即相沿之舛訛未能一一淨滌也但請之邑侯事以類記類以文貫不敢襲印板套數耳尙冀後之博雅君子訂其謬而補其闕俾得成一完書仰副當事盛舉則芻蕘之言庸瑣之筆得附立德立功之人以並傳雖龍鍾野老將與有榮施焉

鍾祥縣志清乾隆六十年知縣張琴主修縣學教諭李元輔協修其纂修者則縣人

杜先生光德縣人張夢羆樊若谷胡德昌庾嶺春陳大節黃建中吳邦彥廖逢年

諸先生任分修黃适黃如楹吳登青鄧錫齡諸先生任參訂書凡二十卷首冠圖

考其目曰星野曰疆域曰沿革曰山川曰城池曰田賦曰隄防曰學校曰祀典曰

禮儀曰風俗曰物產曰古蹟曰職官曰封爵曰兵防曰名宦曰制科曰恩封曰人物曰列女曰流寓曰藝文而以雜紀終焉凡例十三條有知府施學奕知縣張琴

及杜自序錄杜自序如左

越序云維桑與梓必恭敬止古人於鄉之草木猶懼有隕

命乎今天下郡邑皆有志志近於史雖紀事屬詞而實有道有法事取於核詞取於質道取於直法取於嚴然志有難於史者史所據起居注編年紀月綴以成書志則掇拾舊聞等于耳食懼事與詞之不副也夙昔為此論輒與同學諸君及之會邑侯張公韻齋有志於續修縣志而同學諸君舉予以膺是役予曰賢侯之命諸君之擇志之承也事與詞或可踴勉措手而道與法維難鍾祥之有志肇於宋之富水志明初增修富水志邑人孫司徒有安陸州志俱荒遠無稽矣嗣是承天興都有志萬曆間則京山李本寧尙書纂之迨國朝康熙初有郡志而同時邑人鄭實菴副使創修鍾祥縣志至乾隆三年邑人李石湖先生復假手儒生增輯之今近六十年矣張侯之汲汲於此固其宜然願以一邑之補綴假手儒生筆則筆削則削筆者未廢同己之望削者已滋異己之疑簡非南史筆非董狐恐不免為譽議耳然而頗費討尋不悖得失歲籥一周耳目心手更迭為用幸得董成帙以報命于賢侯今新尹周公蒞鄧諄諄及此欲亟觀焉予因謂同學諸君曰曩與公等所稱難者經之以事緯之以詞其間軌之以道與法志于是乎可畢而綜事詞之紛綸定道法之畫一惟兩賢侯先後其成之予則猶然不弛此恭敬之心謝不敏矣諸君亦曰唯唯

鍾祥縣志清同治二年知縣許光曙創議四年知縣孫福海會商縣人聘武昌張裕

釗先生主筆任分修者則縣人李煊唐澍關棟陳學漣王士杰劉詮劉榮黃自瑄
 黃自琦周兆鴻張端諸先生書凡二十卷補編二分建置沿革城池山川古蹟田
 賦禮儀祀典學校兵防藩封職官選舉名宦人物列女流寓仙釋祥異藝文諸目
 隸建置沿革者爲星野疆域形勝風俗物產隸城池者爲解署公局街衢驛傳鄉
 市橋梁坊表隸山川者爲津渡堡砦隄防隸古蹟者爲陵墓隸田賦者爲戶口倉
 儲郵政隸祀典者爲寺觀隸學校者爲書院社學義學以圖冠首以雜識殿終仍
 仿前數志例篇首有孫福海序末載知府陳建侯艾浚美兩序蓋鈐板後始作而
 邑人亦有重修邑志始末記附載於後茲錄孫序於左

序云鍾祥古郊郢地逮江左乃置長壽縣其易今名

則自明世宗始世宗以藩服入嗣大統大禮之議廷臣交訖要其初政煥然及其後
 卒剪剔權姦威柄在御奉爲一代之英主稽其受命纂服之原實肇基于茲土抑豈
 非山川雄異扶輿磅礴之氣孕毓而致然哉故自古碩彥名人多產其地風流餘韻
 芬芳溢於記牒迄今而未衰考宋郢州刺史張孝曾舊有富水志已佚明有孫尙書
 交安陸州志又有顧尙書鑾李尙書維楨所修與郡志爲世所稱求諸邑之藏書家
 並不可得所見惟國朝錦州張尊德所撰安陸府志頻陽程起鵬邑人李蓮杜光德
 前後所修縣志而已杜志爲最後然距今亦七十餘歲矣時會遷移政事沿革遺聞
 故載漸就放佚君子閱焉同治三年沅陵許君來治鍾祥始議纂輯甫開局而許君

奉檄去福海實承乏攝篆于此乃與邑之士大夫誼諮與論鉤稽案牘考鏡前聞哉
 定議例又益借楚中方聞綴學之士往復參訂舛者更之繁者去之奪漏者增之經
 始于乙丑十二月訖丁卯十月歲事凡為書二十卷雖其間補闕糾謬或更有待於
 來哲然視舊志頗為事增文減蓋用力亦已勤矣抑又觀古之為郡邑志者若宋之
 刻錄暨乾道新安咸淳臨安諸志並翔實彬雅事蹟完具為後世所徵信洎明代朝
 邑武功縣志乃始以簡要取貴於世蓋明人多務講學而考證或從其略其書往往
 為固陋者所藉口是以昭代諸儒力更其故李程堂氏撰臨川縣志錢竹汀氏撰鄞
 志並主於詳贍識者越之况邑古稱望縣遠則楚國先賢之遺風近則勝國潛邸之
 舊事重以我朝一代賦役官師廟學兵防之制忠孝節烈名賢碩儒之懿紀載者務
 崇體要無為蕪累而已若邦之盛美豈可闕遺是以原本見聞備詳於簡冊所以備
 一邑之掌故使後之君子將有考于是書者克慊於其志也若
 夫發凡起例義類指歸悉寓於諸類中故不復述於其首云

正誤

舊志若干卷既如上述其佚者無從攷其內容就現存諸志論或經衆手或係專
 著體例各有異同文藝亦不無疏密然綱舉目張事以類附要皆博採宏搜俾鄉
 邦文獻燦然大備自非淺見寡聞者所能幾其一二也惟方志首重地理地理名
 稱彼此互襲最易混淆吾縣在春秋戰國屬楚秦漢以後曰郢州曰竟陵曰安陸
 膺是名者不一其地但就名稱所及遽以其人其事載之篇內此外誤所以層出

也分別正之如左

一因楚而誤楚地廣縣特郊郢一隅耳楚材衆多惟宋玉可稱縣人證以水經注輿地紀勝及唐宋以來所稱陽春台白雪樓蘭台宋玉宅宋玉井宋玉石諸古蹟較爲有據然議者已不無異詞其他若鬪穀於兔鬻權孫叔敖之屬謂其全生於郊郢殊屬無稽程志於鄉賢列楚材十有一人而於列女又列樊姬伯嬴等於高士又列漁父漢陰丈人等於仙釋又列章宸皆因楚而牽連及之李杜及同治志雖各有刪剔然去此存彼不無可議此宜正者一也

一因郢州而誤楚郢都在今江陵郊郢其別邑漢初就郊郢設縣稱之曰郢是吾縣置縣之始此證之班志而可據者自東漢郢省逮三國時魏文以江北諸郡爲郢州郢州之名始見於史劉宋以後一彼一此互列爲州至十有三宋張聲道序富水志已詳言之至縣爲郢州治實自後周始程志於南北朝之郢州刺史羅列甚衆李志從而正之曰郢州立名不專屬石城郡北魏立於真陽後魏立於義陽西

金 補 縣 志 卷 二 十 八
魏立南郢州於比陽蕭梁立北郢州於安貴宋武分荊州之江夏竟陵巴陵諸郡
立郢州治夏口官其地者自不得概移之石城郡之郢州舊志多未核今攷各史
刪之云云其說當矣及觀宦蹟所載視程志更擴而張之均與吾縣無涉按郢州
治石城自後周始考隋志及通典寰宇記皆無異詞據是則周以外諸官郢州者
均不宜列李志於宋齊梁陳及北魏西魏概行登載杜及同治志均仍之此宜正
者二也

一因竟陵而誤竟陵本今天門自晉元康九年設竟陵郡治石城竟陵郡實在今縣
然蕭齊建元後竟陵郡又移治竟陵是齊梁之間不惟官竟陵者不宜入志即官
竟陵郡者亦不宜入志程志職官自劉宋始凡晉代竟陵太守均未列入李志補
之當矣然李志於宋齊間專列郢州刺史至竟陵太守反未列入杜及同治志仍
之此一失也尤可異者縣自梁大寶後已屬西魏各志書郢州刺史乃均逮於陳
既書陳之職官而於北魏北齊北周又兼書之其失殆尤甚焉此宜正者三也

一因安陸而誤德安府之安陸縣自漢得名迄今未改若吾縣有安陸之稱則自元至元十五年改郢州爲安陸府始至元以前凡史乘所稱安陸者皆今之安陸縣自無疑義程志於晉朱伺唐郝處俊許紹宋張君房令狐揆鄭獬廖正一明萬鵬等皆搜入志內仙釋有巨方亦錄之此宜正者四也

再明嘉靖中以荊門望馬諸鄉畫歸縣境界起訖案無可查自興都志稱馬良改隸縣境不惟有清程李諸志仍之即府志兩一統志與前後省志均沿其說馬良古內方一名章山人物有三國時馬氏五常古蹟有基城權城及章山郡各志均分門登載李志於權水會漢且辨之甚悉今查縣境地圖馬良未列區域之內詢諸土人亦云隸荊門與鍾無涉同治志凡關於馬良者均削之幸已先正其誤矣再此外有未敢輕議而不能已於言者如名宦鄉賢諸人是名宦凡四十九人鄉賢凡二十八人其姓名具見典禮文廟祀典後無容再錄其中可議者名宦如周召穆公下逮南北朝韋叡諸人因楚因郢州而誤已具前說至清初除賈濬金德嘉

外若蔣永修楊素蘊等尙有十二人所任何官姓名既未著於表有功德於民者何在事實又未列於傳雖欲從而補之亦苦於文獻無徵也再就鄉賢而論必以生斯土者爲範圍所祀春秋戰國諸賢除宋玉外皆因楚而誤亦如前說至明之郝敬本京山人從祀郡學則可從祀吾縣亦殊未當曾璠係明會輝之子省吾之父誤列清代亦宜更正竊維從祀一節在君主時代實爲重典既經列祀必有盛德大業足以昭垂百世後生小子何敢輕議惟詳考始末俾著於篇此修志者之責前志既闕焉未載陵谷迭遷檔案盡失不得不撫卷而嘆也

再明自嘉靖十年以前州學訓導若熊斌黃汝舟湯毓楊昶諸人均有碑記可考前清府縣諸志概指承天府學訓導一若安陸州時代無一訓導者其誤甚大茲按興都志分職內於安陸州曰訓導熊斌而下二十六人於承天府曰訓導蕭廷儲而下六人亟爲正之

以上所舉皆係犖犖大者至其他考核未當或後志已經更正或踵訛襲謬未及更

正經此次釐訂者均於篇內隨條聲明未煩一一述也

拾遺

舊志之誤既釐正如上惟綜觀各志凡應載未載者亦不一而足此非前賢之失蓋書籍未備有以致之也當清初大難初平賀鄭諸公從事草創所依據者獨明萬曆間孫文龍承天府志維時富水安陸兩志久佚即興都與承天大志民間亦鮮有傳本明代人物如同治志所補之戴錦衣傳在百年內且無從得其概略他更可知至明末節臣如李向中之從容就義又以恐觸忌諱不敢多爲敘述其因陋就簡姑借是以潤色昇平頌揚當代固有無足怪者乾隆初李石湖先生以退老封翁毅然以著述自任所以補程志之缺者頗多然嘗自謂家藏書籍燬於戊戌之災此間藏書家亦各不一借所感困難可想而知越五十餘年杜虹山先生繼之然亦潛處里門專事鈎稽吾縣藏書家本屬無多就令予取予求斷不足供其參攷及同治初年當途延武昌張濂卿先生主筆邑中諸老宿以修志縣中事

應由縣人自任不免稍存意見觀志末所載輿論可以考見一斑其時匪氛尙熾世家舊族不常厥居其書籍更無論矣鼎革以還國難頻仍有志著述者雖欲隱居鍵戶日從事筆墨之役亦幾於無樂土可尋然以參攷書籍論較往時實爲易求蓋自活字板行祕籍珍刊日有所出而圖書館之設自都會以下逮一州一縣苟幸免匪禍之區皆可隨時流覽隨時抄錄即如吾縣從前諸志在縣內無從搜求者次第就北平圖書館抄出而前明承天大志故宮藏本亦經照繕即興都志當時未予付印者近且從東方文化圖書館得之視鄉先哲藏書不多借書不得者其幸不幸爲何如也茲篇按類增輯所獲未易縷舉其重要者如長壽立縣千年任縣令者舊志僅載元時張世昌一人茲於唐得一人於宋得一人趙宋登進士者舊志僅載黎亨繼別之傑二人茲復得十三人別之傑當南宋末年勳業文章炳耀一時舊志僅就宋史本傳摘其請終養疏一二語列入孝友傳茲已撮述事實詳著於篇至李向中在清代未敢多叙者亦就各雜記所錄哀次成篇俾孤

忠亮節得以昭示來茲又明周正從祀滁州大同名宦及本府鄉賢祠已從興都志補入正本傳此關於吏治人物之亟宜表章者實足補前志之缺再近攷興都志拾遺內所引孫交安陸州志原文關於唐宋以來郡縣疆域極爲詳核按其文義孫志似又轉載富水志原文爰備錄之以供後之考沿革者

宋富水郡志

通典云富水郡去西京一千四百三十里去東京一千三百九里元和郡縣圖志

云郢州西北至上都一千三百八十五里宋京兆府西北至東都一千一百二十五里

宋河南府元豐九域志云郢州至東京一千二百里舊志郢州至東京一千二百里至

西京一千一百二十五里宋淳熙間至行在所二千一百一十里

四至八到

通典云富水郡東至安陸郡三百二十九里南至景陵郡四百里西至江陵郡二百八十里東南到景陵界一百五十六里西南到江陵界八十里西北到襄陽郡

三百一十六里

元和郡國志云東南至復州三百里西北至襄州三百一十里正南微西至江陵府三百里東北至隨州三百六十里

元豐九域志云東至本州界二百九十五里自界首至安州一百二十五里西至本州界三百里自界首至江陵府三百二十里南至本州界二百四十里自界首至江陵府二百五十里北至本州界一百五十里自界首至隨州三百里東南至本州界一百六十里自界首至安州一百四十里西南至本州界一百二十里自界首至江陵府三百六十里東北至本州界一百五十里自界首至隨州三百四十里西北至本州界九十里自界首至襄陽一百六十里西至荆門軍九十里南至復州二百一十里北至襄陽府二百四十里東至德安府應城縣一百九十里東北至隨州棗陽縣界二百四十里西南至江陵府潛江縣界一百四十里西北至襄陽府宜城縣界九十里水道由漢江而上至襄陽府七百里自漢江而下至

漢陽軍漢口一千四百里長壽縣境廣二百四十里袤一百六十里東至京山縣界四十里西至荊門軍長林縣二里南至復州景陵縣界一百七十里北至襄陽府宜城縣界九十里

按長林縣下但云二里當有漏字

右錄興都志原文此後尚有宋築城斷碑并跋另入藝文碑目據興都志附注云以上并安陸舊志然就開首宋富水郡志五字而觀安陸州志似又轉錄富水郡志也篇內所述里數各有不同與現在情形自難吻合然兩志久佚幸獲窺豹一斑自屬可貴况陵谷變遷沿革不一就所載而尋唐宋之故迹亦可以得其梗概矣

雜紀

方志家於所採事實無類可歸而棄之又覺可惜者多於篇末附以雜紀或稱叢談其所載者雖多怪誕不經然小之足資談助大之有關勸懲於風俗人心或不無裨補茲擇錄舊志所載附以近事仍名雜紀云

重刊系
附錄

漢沔會流處岸上有石銘曰下至水府三十一里相傳李斯刻石於此天下水府一十八處

宋張橫渠過郢涉沔有僧捫其琴橫渠曰琴不祥矣遂棄之水

城北百五十里有楚王墓宋建炎間有竊發者墓中黑蜂輒出人莫敢近蓋不知楚何王墓也今地名石羊石虎灘是矣

唐郢州刺史樂坤原名冲文場不利夜禱華岳廟神云來年有岳坤及第遂改名坤果驗又祝官職謂官歷四資郡守而已乃終於郢州

郢州別駕黃泳字宋永年三歲讀書過目成誦大觀二年應童子科赴闕引見徽宗摘毛詩如南山之壽句以發誦泳應聲曰不騫不墜上以崩字爲問對曰詩人之言不識忌諱臣安敢復道上大悅乃歷見後嬪爭遺以金錢菓餌越明年賜五經及第

郢州漁人擲網於漢水舉之覺重得一石長尺餘圓直如斷椽細視之乃羣小蛤鱗

次相比以物試抉其一端得書一卷乃天寶中所造金剛題誌甚詳字法奇古其末云醫博士攝比陽令朱鈞掩比陽乃唐州屬邑不知何年墮水首尾略無沾濡居民李孝源寶藏其書蛤筒復養之水中客欲見則出以示之孝源感其異因捐貲寫經一藏於郢州興陽寺特爲嚴麗

明世宗南巡時駐衛輝府一夕行宮火世宗亟召大臣等至俱遲獨陸炳直宮門因得扶世宗升輿避火炳自是益相親幸即拜爲都指揮使世宗既春秋高退居永壽宮奉修立事詔成國公朱希忠等直贊無逸殿炳亦與焉復加保傅柱國炳掌錦衣衛事久喜訶民間陰事京師富貴無一得脫者人畏之如乳虎顧獨折節延納士大夫以此稱其賢先是咸寧侯仇鸞柄事凌轢縉紳與分宜聲勢相軋鸞密奏分宜父子不法狀世宗寢疎分宜會鸞病疽且死炳心石分宜乃噉舍人上變因發其勾連俺答事從其家得號帶爲證世宗大怒時鸞已死詔斲其棺戮屍於市而分宜由是復得幸時華亭在政府與分宜不協而給事中吳時來張紳董傳

策交論分宜以吳張皆華亭所取士而董又其鄉人疑爲佐使泣誦於世宗前世宗以問炳炳不敢言而封癸丑會試以進乃私屬貴璫調停甚力世宗意漸解其智數能周人緩急如此先是世宗威嚴言官稍不稱旨即被杖炳每戒杖者謹護持之以是善類多得保全逮隆慶中人有言其生前不軌者詔削奪爵典貲產盡入官又考弇山別集稱史於陸武惠炳傳云己亥世宗南幸承天至衛輝行宮夜火侍衛倉卒無在者獨炳身負世宗出於火世宗識其姓名即拜都指揮使累升今職至華亭公所撰墓誌於炳事甚詳却一字不之及豈公于其時有所諱耶縱諱之何不略言南巡時効勤勞與遷轉乃至并扈從俱略之也志稱炳以戊戌管衛事冬轉實授指揮使加俸及服色一級甲辰冬署衛印獲子殺母者升都指揮同知則己亥之扈從與歸而拜指揮使皆誤也史言炳任豪惡吏爲爪牙多寄耳目銖兩之奸悉知之富民有過者即榜掠文致成獄沒其貲產所屠滅不可勝道累貲至巨萬豪侈自奉營別宅十餘所皆崇麗分署姬妾紈綺寶玩所在充物供

張不移而具時游處其中東西惟意又置良田於四方若揚州嘉興南昌承天等處皆有莊店聲勢震天下可謂實錄獨其陰操吏兵二部權每文武大選岳牧進退時時與之而給事御史翰林史部多有出其門下者始與嚴氏石交晚而移嚮嫌隙已成彼此各俟間而發此皆未之及也

世宗在興邸左長史曰張景明右長史曰袁宗皋宗皋至禮部尙書文淵閣大學士贈太子太保諡榮襄而景明先卒贈尙書大學士

世宗在藩邸錢定侍讀一日忽問曰昨夜夢髮白當作何兆定曰王上添白其吉可知

郡城西北五十里曰朱家埠有喬安寺相傳爲五代時所創其地有大樹頗作怪爲地方害忽有西僧至乃伐其樹爲佛因以建寺怪遂絕

石城五鳳蓋劉氏父子兄弟也劉洪以成化戊戌進士歷官都御史贈刑部尙書子概正德辛未進士授行人諫武宗南巡杖卒忠義耿耿而渠臬同登正德辛巳進

士俱歷官都御史弟梁舉孝廉以文學名此一家之隆世所罕儷其在一時則有若孫交之秩聯八座商大節之位居中丞俱在一城中可謂盛矣

純一道人居玄妙觀道行甚高興獻嘗與之游一日憑几假寐見純一入宮中及覺問左右曰純一來此乎俄報宮中生世子矣後世宗登極建純一殿即其他修元佑宮窮極壯麗焉

鄧東松林山居民方聰嘗夢興獻至其家羽衛甚肅既覺不解其故及興獻薨卜地即聰夢所坐之處今遺陵是也乃以東山田易之人皆謂有定數云

安陸州故有岳武穆祠爲十八景之一自升州爲府營建宮殿祠遂湮廢萬曆中守備杜正茂創興岳廟取爲周垣之用恰相當於城西關土下多積石最後得一碑出而洗之光澤可照遠望之有人影甚多其一奇偉豐腴簇擁而過如此經日衆歡呼以爲武穆露形也入夜役卒守之見一偉丈夫躍出騎白馬冉冉乘雲而上從者數百遙見天門開一人袞冕迓之而入守者驚伏不敢出聲比明碑上題一

詩云北伐隨明主南征拜上公黃龍已盡醉長侍大明宮俄震雷大雨洗去一秀
士錄之味詩意知武穆已轉世爲英國酬此願矣

王越以軍功封威寧伯後仙去踪跡多在太和山畧大山中丞嘗就山中訪之即日
遁去越數十年尙有見之山中者

萬曆三十六年六月十九日民間訛言爲福王選婚於郡邑自搢紳以及小民無不
爲子女嫁娶者雖三四歲之女俱出閣每夕動以手計至二十五日乃止官雖多
方禁遏而民間愈洶洶後以漸至各州縣俱不免云

萬曆三十一年八月楚藩宗室從仁宏所從義三襄等糾宗中不逞者於漢口郊外
要截貢物撫院趙可懷發兵擒要截者係臬司獄次日從仁率黨索取撫院不從
從仁袖銅錘椎殺之直指吳楷劾其事檻車囚從仁等至郢新撫梁雲龍等會審
得實於三十二年五月斬從仁宏所於留守司三襄從義俱賜死衆稱快

河西三尖山層巒聳翠蜿蜒至三十里澗壑險僻地多蛇虎人跡罕到或曰鬼谷子

別洞也明萬曆中有江右孫翁龍溪來居之有子六人皆以龍名人莫測之一日人見一老翁自稱上林老李冰姿鶴鬢手執鐵如意揮少年四人童子四人徑往孫處是夜雷雨大作平原水湧八尺向之所謂孫宅僅見龍窟十四自是分降甘霖相傳爲龍窟港云

孝廉李正芳粗知天文萬曆丙午年正月朔之三日夜見西方星亂墜曰此賊星也天下自此多事矣後李自成張獻忠羅汝才諸賊多丙午生者

鐵牛埂之鐵牛於明萬曆間每夜食民田禾居人蹤跡之乃鐵牛也遂斷其一足又寺下石坊獅子夜飲山井水人見而驅之疾登坊上亦斷其足

邑孝廉盧洪超萬曆間人善書工文初洪山有高僧臨終謂其徒曰我當轉生於郢盧某家汝來看以一笑爲信盧某生子三日後有僧求見子果一笑僧言其故因名洪超

邑鐵牛埂內侯家塘東嶽廟鐵鑄神像相傳先年隄決水流至此因建廟祀之掘得

古磚書永明年製蕭齊年號也廟重建於嘉靖時故其聯云古廟正當嘉靖世遺
碑猶記永明年

郢北樊村洲豐樂河西岸漢水東繞滌水西縈洲浮水中明崇禎六年聞賊將入襄
衆請乩避亂乩云東邊日出西邊雨惟有中洲可託依衆不解七年五六月賊大
至惟洲四面以夏霖水漲賊不能渡避洲上者皆獲全始悟中洲可託之義

崇禎九年丙子流賊號紫微星者寇郢距城三十里按兵不進曰吳公清廉愛民我
何忍犯之遂率衆去是時吳尙默爲荆西道有惠政

崇禎十三年督師楊嗣昌困賊張獻忠於川之巫峽人馬且盡旦夕受縛拚死潰圍
出僅三十七騎嗣昌急檄郢鎮錢中選伏兵於荆門要害截殲之中選畏縮不敢
前賄王璫以陵寢爲辭賊僞爲督師差官給破襄陽殺掠幾盡勢復猖獗不可制
皆中選及王璫誤之也

陽春城門皆裹以鐵崇禎辛巳冬月無故自焚

盧老君名練年九十六或問調攝之術對曰不知但於世事一無所罣於懷耳衆稱人瑞與鄉飲一次

郢東龍泉寺崇禎初賊至舉火焚寺甫燃一椽即大呼爲多聞天王所縛衆賊爭救之得不燬末年賊復焚之靈應如前寺至今稱盛云

六月十七日明興獻忌辰也每歲於是日衆官謁陵拜祭崇禎壬午衆官方拜雷雨大作頃刻水深數尺有龍隨水而出壞人畜衆皆抱樹得免識者知明運之將終明年元旦闖賊陷郡城

崇禎十五年十二月初九日邑舉人王際隆聞賊逼近同坐軍營方中夜斬關而逃闖城奪氣

李佳胤未詳何地人崇禎末爲直指中軍督客兵守城每登陴浩歎志期殉國癸未朔城陷自刎而死

闖賊於癸未朔陷城次日發顯陵雷雨大作擊死數人遂止後折家廟正殿忽暴雨

大注殿傾壞斃數十人時有外縣二生避雨其處亦并壓於磚石下次日伸手於外見者營救出之故安然無恙也

顧君恩邑諸生李自成陷城用爲僞吏寵待最隆及賊敗南下欲趨汝南君恩力阻之盤距二年數百萬生靈遭其屠戮皆君恩所爲也

吳大雁邑諸生生時父夢曹操至其家因取乳名曰瞞癸未賊陷城爲曹操羅汝才所擄授裕州僞防禦果符其夢

李之則京山諸生賊黨謝應龍距郢時之則糾合鄉義潛圖復城事泄爲賊擒亂箭射殺之

明末屢亂白骨遍野邑人憫而收瘞之爲三大冢每冢骨不下數萬二在丁公廟一在顯陵衛路口有堪輿家至衛見之云此冢不宜居民發之其骨有微紅色者疑有鬼祟遂移葬卑下地

白水上里餘有民李松號竹軒生平未入城市年百十三歲清初郡守造廬願見妻

楊氏亦百歲焉

青泥池相傳爲梅福煉丹時丹灶火灰積於地面故泥皆青色水深二三寸雖大旱不涸後因土人去其青泥濬之使深池遂不復貯水俗稱池旁周百餘丈夏夜無蚊虫云

鄂南隄外新菴及隄內黑城頭一帶兵燹後田盡荆榛遂爲羣虎穴往來裹足清順治十七年協鎮郝爾德率所部兵深入窮搜指授有法日擒數虎而一卒不傷後虎患復熾有白額花虎最猛驚噬人尤多鄉民有華玉者勇力過人素稱善搏康熙五年六月自願殺虎除害徧覓遇白額虎玉執械扼虎頸爭鬥踰時手刺殺之力盡與虎俱斃人咸憫之而虎患由此遂息

漢江有佛沙船行屹然而止其下即沙水湧沸舟子無以施其力俄頃即湮溺以蘆蓆布油米其上擲船下三五次乃得行

小司水南出經馬鞍山皆平岡夾水至土陂港頭忽開曠橫幾五百步縱幾七百步

兩崗復合水出其中旁有冢曰皇冢高丈餘上土下累青石無碑志可考

康熙三十九年郡守婺源吳肇榮居官清正有景陵縣民蔡伯超娶妾爲妖物所憑符術莫能制赴府呈訴吳飭縣嚴拏妖即斂服復以檄驅之妖遂屏跡七邑頌異政焉檄略云本府奉天子命守郡七邑中有匹夫匹婦不獲其所者皆本府之責前據生員某呈稱大佃垵民蔡伯超無子娶妾余氏一夕而物憑焉并將媒人與蔡氏之廬一炬灰燼侮慢神祇飛沙擲石等語披閱之下不勝髮指夫伯超以無子娶妾既爲所憑不能生育是絕其宗祀也灰燼廬舍是促其流離也侮慢神祇飛沙擲石是擾亂我地方也朝廷之法上帝之鑒皆在所不赦當飭縣拏解若不肯來或不遠遁是頑冥不靈敢於傲命吏藐鑒觀占人妻女塗炭生民也定即通詳題請飛召天師上達帝廷必滅其族類而後止昨據景陵縣詳稱奉發拏解即伏服消滅蔡伯超亦稟稱奇怪畏天遠逃等語合再出示曉諭爾如有知其靜聽本府言夫宏農之虎負子渡河湖州之鱷讀文徙海雖感劉韓之德實際唐漢之

盛本府不能效法劉韓今天子勵精圖治過化存神實過漢唐遠甚爾既聞拏懾
伏是非頑冥不靈者比是知有天子之命吏上帝之鑒臨自今以往爾其潛踪遠
遁伏處於深山穹谷之中修真悟道除絕邪思改過遷善早歸正果尙能陰隲下
民感動上帝縱未必躋九品之蓮臺猶可享一方之血食若怙惡不悛故智復萌有
干天怒致煩嚴切徒費百年之功修竟成一旦之罪人捫心傷感噬臍曷及思之
慎之勿謂言之不先誠之不切也

郢城杜氏曾祖名賢歷官雲南參府少時驍健任俠掇千斤未嘗改色游漢鎮有惡
少年強掠人即格殺之後數年杜自湖南歸次漢上秋水瀾漫無際有老翁趁船
神采迥異杜心訝之杜手一卷翁曰何書曰周易翁曰解此乎曰窺測未到耳翁
曰吾習此因伸其義語多冥妙杜拜服叩翁何人翁曰吾盜魁也前汝格殺少年
爲門弟子今將報復不利於汝觀君正人吾不忍傷言已告去時拽帆江心翁推
篷踏浪如履平地烟霧幻晦不知所往

楊學士炳未生時其父石菴與鄉老人某善老人精堪輿爲石菴卜葬其父曰地主發貴三年後大雪瓊瑤滿地當生子是也閱兩載學士果生生之前夕大雪老人跨蹇至謂石菴曰生子乎曰已生老人復取日時推算色喜曰真貴格當大魁後學士果南宮第一探花及第

郢人濬城河夫工雲集有小兒弄泥爲人形置土窟中明日過之焚香有祈禱輒應已而濬河者聞之各有叩求皆不爽遠近風傳朝謁者魚貫而至名其地曰新河寺樹旗鳴金徹夜燈火如晝縣令萬鍾傑過之斥曰小魅也立橋上遣役捉土形拋水中踐平其地懸示鄉城言神怪者撻之後遂泯然

任家埂三義廟即本空廟昔之烟波浪埂地也先年漢水泛漲潰埂侯家塘一帶皆其所衝之潭居民皆後所建置者雍正二年埂復決水衝邱家田畝一帶爲潭今名邱家潭乾隆五十九年秋漢水復破埂傷人畜寺坡下十字街心被水衝平地深丈餘埂上民房波濤捲去而三義廟屹立如故

乾隆甲寅秋水決鐵牛埂城東半頭街當其衝有水月菴水貫大門經前殿汨後殿須臾沒檐四垣皆倒水退惟前殿獨存而關聖像如沐浴而出鬚眉鮮潔凜凜猶生其中冑袍鎧金碧爛然無毫髮之損侍立將官儼然新塑雖供案木板案上磁罏不移尺寸其他神像彌望皆朽木殘泥龕供蕩然矣人驚以爲關聖靈應往來瞻謁者不絕於路

獨樹嶺在縣東四十里有栗孤聳大廿餘圍遠望隆然枝葉皆北向有拱宸之象歷年已數百矣

嘉慶初某將軍麾下羅姓將官者性驍勇偵賊至普門冲之羅家山賊自稻田突起傷羅羅一手掩胸一手奮矛殺賊數人馳至中軍而殞人以地名爲讖云

毘陵許維楫令鍾祥縣民有強姦子婦者婦不能拒然甚愧恨適其父來視女哭訴之其父遂殺其翁獄成父女俱問重辟值夏包子之亂獄囚俱逃散事平許出示招衆囚且引某年之例得減等免死獄囚多有還者父女亦至旣許以其獄詞上

臬司疑未平允不獲所請許惶恐無策其幕客江某勸令請之撫軍許因循未果而此囚即日起解矣江乃焚香祝天代作書啟撫軍自以千錢付捷足投太府撫軍得書惻然即召臬司令寬釋之囚泣謝臬司曰非我活汝活汝者汝父母官也囚歸搏穎謹呼於庭然不悟爲江某力也未幾江返江南一子隨行附鹽艘下長江子方七歲偶至船頭被篋纜掠入江中號呼求救而江水洶湧轉盼不知所在方號呼間前舟見一兒浮江上急救起江視之則其子也詢其子云初下水時仰臥波上平於衽席初無驚怖衆咸詫其神異江乃述其事知爲活此囚之報云城外東街火神廟素著靈應咸豐四年賊擾郡城賈民多寄宿廟中有土匪十餘混入其內謀竊官藏火藥更餘分數賊先入貯火藥所潛匿至三更廟內忽如震雷人皆驚起見有火光自城外飛入須臾火發冲藥室燒斃三賊時有蕭姓賊被焚未即死具道所以

崩頭康山勢險峻中有岩洞竅曲而深頗幽僻咸豐四年賊由當陽踰嶺驟至衆不

及走旁近居民扶老攜幼相率入洞避之爲賊窺見聚薪藁洞門前焚之所薰斃六百餘人復有全家俱歿以至絕祀者四十有八家

光緒十四年戊子城中大疫日死數百人一日府城隍廟城隍自焚疫漸息城隍木質服宮袍歲十月郡守例巡城郊迎城隍前行相傳某歲巡畢返距廟門百步許昇城隍者忽不能移步久之郡守前行昇者始舉趾如故衆以城隍遵賓主請郡守先入廟立顯靈坊識之是歲城隍自焚殆捨身救衆云

郡學宮舊有尊經閣年久失修椽柱傾欹訓導阮某斧爲薪日以爲常無何阮自縊於廁而死衆以爲神所殛云阮通山人

光緒十九年癸巳五月十四日元佑宮三洞閣火閣高九丈九尺明嘉靖中建歷年將近四百崇宏壯麗爲郡城建築之冠是日不知火所自起主持道人委爲進香者焚黃所致俗例凡赴廟進香以朔望爲期十四進香殊乖事實且焚黃亦無引火之理說者咸推爲定數云

元黃文獻名潛字晉卿婺州義烏人年八十一卒葬義烏縣東北三里崇德鄉東埜
之原見宋景濂所撰行狀而吾縣裴家高廟後於民國八九年間因某姓卜葬掘
土數尺忽得一朱棺柩首書黃公諱潛字晉卿等字自別爲一人惜無碑碣可考